



Mi tingim bifo taim Flame stockfeed i bin nambawan kwaliti
na value stockfeed bilong ol pik bilong mi....
nau emi kam bek!
WELKAM BEK!



Sainim kontrak pinis...

William Bando na Michael Waipo i sainim foapela yia kontrak...Hela Provinsal Edministreta William Bando (sanap namba tri long raithan) na Komisina bilong Koreksenal Sevis (CS), Michael Waipo, i sanap wantaim Pesenel Menesmen Seketeri John Kali, Fainens Minista James Marape, na Memba bilong Koroba Lake Kopiago, Philip Undialu long Gavman Haus long Tunde dispela wik. *Poto: Nicky Bernard Moa stori long pes 2*

Insait...

Polye go long
kot long larim
Palamen i sin-
daun - P3



Sir Peter ama-
mas long TPA
opis stap long
Madang - P5



Lokol memba i
givim ambulans
- P11



UPNG sumatin no stap long klas

OL sumatin bilong Yunivesiti ov PNG (UPNG) long Waigani Kempas i no stap long klasrum taim ol poroman bilong ol long Taurama Kempas long 3-Mail i statim skul pinis long las wik.

Bihain long ol polisman i bin sutim ol sumatin tupela wik i go pinis, planti ol sumatin long Waigani Kempas i lusim skul na stap nabaut bikos ol i pret long sefti bilong ol.

Planti sumatin i lusim kempas na i go stap wantaim ol famili o ol poroman bilong ol ausait long siti.

UPNG Administresen i bin tokim olgeta sumatin long go bek gen long kempas na statim skul long Jun 14.

Long las wik Ekting Sensela, Dokta Nicholas Mann, i tokim olgeta sumatin long go bek na statim skul gen, tasol ol sumatin i no stap long klasrum na i no gat wan-

pela lekse i kamap long Waigani Kempas.

Dokta Mann i tok planti sumatin i laik skul gen tasol sampela liklik grup i wok long stopim ol long go bek gen long klasrum.

Em i tok ol sumatin i wok long isi isi go bek gen long Waigani Kempas na dispela em i soim gutpela sain olsem planti sumatin i laik skul gen.

Ol sumatin bilong Taurama Kempas i statim gen skul na wanpela wik i go pinis nau, Eksektiv Dean Profesa Glen Mola i tok.

Wantok Niuspepa i bin go lukluk raun long Waigani Kempas long asde long sekim sapos ol sumatin na leksera i stap long klasrum na statim skul.

Ol wan wan sumatin tasol i wok long raun long Waigani Kempas. Ol i no karim buk o skul bek, ol i

raun nating i stap.

Ol Uniforce sekyuriti i tok Skul ov Nesural na Pisikel Sains i bin laik long statim skul gen tasol sampela sumatin i kam na i laik paitim ol dispela sumatin husat i laik long skul gen.

Ol sekyuriti i tok pait i laik kamap tasol ol i stopim ol.

Mes bilong kaikai i op na ol sumatin i go kaikai. Laibri, buk sop, ol lekse rum, na admin opis i op na ol Uniforce sekyuriti i raun stap long kempas.

Tasol i no gat wanpela sain olsem ol sumatin i statim gen skul. Lekse rum i op tasol no gat wanpela leksera na sumatin i stap insait.

Planti opis bilong ol leksera i op na ol i redi long statim gen skul. Tasol ol sumatin i no stap long klasrum.

Edministreta na Komisina sainim kontrak

EDMINISTRETA bilong Hela Province, William Bando, i sainim pinis kontrak bilong em wantaim Gavman long kamap provinsal edministreta long foapela yia.

Mista Bando i sainim kontrak bilong em long Tunde long dispela wik long Gavman Haus long ai bilong Fainens Minsta na Memba bilong Tari-Pori, James Marape, Memba bilong Koroba Lake Kopiago, Philip Undialu na arapela ol senia opisa bilong Hela provinsal administresen.

Mista Bando i gat 47 krismas and em i man Hela yet.

Em i bin stap eking provinsaledministreta long Julai 2012 i kam inap dispela yia tasol taim Nesenel Eksekutiv Kaunsil (NEC) i makim em i kamap pemenen edministreta long foapela yia.

Long wankain taim, Komisina bilong Ko-



Hela Provinsal Edministreta William Bando, Gavana Jeneral Gren Sif Sir Michael Ogie na Komisina bilong CS, Micahel Waipo long Gavman Haus.

Poto: Nicky Bernard

rekse nel Sevis (CS), Michael Waipo, tu i sainim kontrak bilong em long foapela yia.

Kabinet i bin makim Mista Waipo i kamap Komisina bilong CS long yia 2014 tasol em i no bin sainim ol pepa bilong em.

Ol senia opisa bilong CS i bin witnessim dispela saining sere moni long Gavman

Haus.

Bihain long sere moni, tupela Waipo na Bando i toktok long kirapim gen Hawa Haus Kalabus long Tari.

Mista Bando i tok Hawa Haus Kalabus i mas op gen long helpim Hela i daunim ol asua bilong lo na oda.

“Mipela i les pinis

long ol man i pait na mekim planti pasin nogut. Hela i laik senis na mi laik wok wantaim CS long kirapim gen haus kalabus long Hawa.

“Mi amamas olsem mitupela kam long rait taim long sainim dispela kontrak bilong wok bilong mitupela,” Mista Bando i tok.

Fainens Minista belhat long LNG papagraun

FAINENS Minista James Marape i belat long ol papagraun bilong PNG LNG Projek long Hela i wok long putim planti giaman nem long lista bilong papagraun husat inap long kisim benefit.

Minista Marape i tok em i les long lukim ol papagraun i giaman na putim kain kain nem bilong kain kain manmeri husat i no papagraun tru.

Em i singaut strong long ol papagraun bilong Hela i no ken mekim dispela kain giaman pasin long stilim mani.

“Dispela pasin bilong yupela ol papagraun yet long putim nem bilong ol dai man na putim nem bilong ol loya o konsalten bilong yupela tu olsem ol

i papagraun tru, i wok long kamapim planti hevi.

“Yupela inap long kisim mani na arapela ol benefit bilong LNG Projek tasol dispela kain giaman pasin i mekim na mani bilong yupela i stap yet long tras akaun,” Mista Marape i tok.

Mista Marape i tok K135 milien bilong ol papagraun i stap yet long tras akaun bikos gavman i paul long givim i go long wanem papagraun grup stret.

“Ol wok bilong painim aut husat i papagraun tru i no pinis yet. Bikpela hevi bilong dispela em i stap long Hela sait tasol.

‘Ol papagraun bilong paipain na LNG plent em ol stap gut, ol i stretim ol

yet gut na i redi long kisim mani.

“Tasol ol lain bilong yumi long Hela i no redim ol yet gut. Sampela i stap long kot haus, sampela i apim nem lista bilong kain kain manmeri.

“Mi bin wok long Angore bipo na i no gat moa long 10, 000 manmeri. Tasol nau namba bilong ol manmeri long Angore i go antap.

“Wankain i kamap long Hides, Juha na Komo. Nem bilong ol tambu lain, ol konsalten, ol loya na arapela ol dinau lain bilong ol i stap long lista bilong papagraun na mi les long lukim dispela kain pasin,” Mista Marape i tok.

O'Neill strongim poroman wantaim Frans

PRAIM Minista Peter O'Neill i bungim Presiden bilong Frans, Francois Hollande, las wik long Paris, Frans.

Praim Minista O'Neill i bin kisim sampela gavman opisa na ol bisnis manmeri bilong PNG long bung bilong PNG Tried na Invesmen Forum long Paris we em i bin bungim

Presiden Hollande and Siaman na Sif Eksekutiv Opisa (CEO) bilong Total, Patrick Patrick Pouyanné.

Presiden Hollande wantaim ol bisnis manmeri na gavman opisa bilong Frans i bin bung long dispela miting we as bilong en em long strongim bisnis, treid, invesmen na

kalsa namel long tupela kantri.

Nupela Papua LNG Projek em i wanpela bikpela samting we tupela kantri bai yusim long apim level bilong bisnis, treid na invesmen.

Biknem oil na ges kampani bilong Frans, Total SA bai kamap opereta bilong Papua LNG projek.



TribeFM Teen Excellence Awards 2016

Nominate your 'Teen Hero'

Do you know an outstanding teenager, who demonstrates leadership and resourcefulness in their community?

The 2016 inaugural TribeFM Teen Excellence Awards will celebrate 7 teenagers from across Papua New Guinea, between the ages of 13 and 19 who have demonstrated personal growth, leadership and a commitment to the community in which they live.

CATEGORIES AND CRITERIA

The nominees must demonstrate the core values of personal growth, leadership and commitment.

HEALTH & WELFARE

For a young person dedicated to improving their own health and that of those in their community by encouraging health-focussed activities in their schools, families and other community groups

MUSIC & ARTS

For a young person who's shown outstanding ability in the arts and music and may have used them to effect change in their community

SPORT

For a young person who's shown significant sporting dedication and achievement and may have used them to contribute to their community

COMMUNITY

For a young person who's passionate about putting other people's needs first, having given up their time and energy for their community

EDUCATION

For a young person who's shown significant achievement or improvement in their schooling, or someone who has a track record of supporting the learning of others

BUSINESS & INNOVATION

For a young person who's innovative and demonstrated a business activity that benefits themselves and their community

DISABILITY

For a young person making a difference by supporting those with a disability, including young people with a disability who are making difference to their own lives and the community

HOW TO NOMINATE

Fill out this form with as much information about your nominee as possible. Incomplete forms will not be accepted.

Entries MUST be received by 5.00pm on Friday 22 July 2016

Please submit your completed form to TRIBE 92FM via one of the following ways:

- Mail to: Tribe92FM, NBC, PO Box 1359, Boroko, Port Moresby, PNG
- Drop in person to your nearest provincial NBC OFFICE
- Via TribeFM's Facebook page (send a photo of the completed form)
- Via Whatsapp to 7019 9105 (send a photo of the completed form)

Queries can be directed to 325 3439 between 8.30 – 4.30pm, Monday to Friday or email wgorogo@nbc.gov.pg

NOMINATE YOUR 'TEEN HERO' FOR THE INAUGURAL TRIBE92FM TEEN EXCELLENCE AWARDS

Please TICK ONE of the following categories to nominate your TEEN HERO:

☐ HEALTH AND WELFARE ☐ EDUCATION ☐ DISABILITY ☐ SPORT

☐ COMMUNITY ☐ BUSINESS AND INNOVATION ☐ MUSIC AND ARTS

NOMINEE'S DETAILS (Teen Hero):

Full name: _____

Address: _____

Date of Birth: _____

Contact phone number: _____

NOMINATOR'S DETAILS:

Full name: _____

Relationship to your Teen Hero Nominee (ie father, teacher, Church leader): _____

Address: _____

Contact phone number: _____

On a separate page, explain in detail why your Teen Hero deserves to be recognised in this year's TTEA Awards. Attach it firmly to this nomination form.

You MUST include specific examples of how they have demonstrated personal growth, leadership and commitment in the category you are nominating them for

Rules/Conditions of Entry:

- Open to PNG residents
- Nominees must be aged between 13-19
- Groups/teams may be nominated
- All nominations must be accurate and original
- Final judging will be done by a panel appointed by TribeFM
- If judges find there are no suitable nominations for a category, no award will be allocated
- Finalists will be notified by phone
- Winners will receive awards/financial sponsorship which are expected to be reinvested within the category they've been awarded
- Winners' names/photos and other details will be published in the media

Proudly supported by:



Polye go long kot long larim Palamen i sindaun



Oposisen Lida Don Polye (namel) wantaim ol Oposisen Memba i laikim vot i no gat bilip i mas kamap.

OPOSISEN Lida Don Polye i putimpinis wangepa aplikesen long Suprim Kot i ken givim oda long larim Palamen i sindaun gen na larim vot i no gat bilip egensim Praim Minista Peter O'Neill i kamap.

Sif Jastis Sir Salamo Injia i tok Suprim Kot bai harim dispela kot long Julai 1.

Tasol loya bilong Mista Polye, Loani Henao, i tokim Sir Salamo olsem dispela kot i mas kamap hariap bikos sapos em i kamap bihain long Julai 27, Oposisen bai no

inap gat sans long kamapim dispela vot i no gat bilip egensim Praim Minista O'Neill.

Mista Henao i tok klaien bilong em i laik bihainim Seksen 145 bilong Mama Lo we em i laikim dispela vot i no gat bilip i mas kamap hariap namel long dispela mun na Julai 27.

Sapos kot i no harim dispela keis na em i abrusim Julai 27, aninit long Seksen 145 bilong Mama Lo em bai hat long Oposisen i kamapim dispela vot i no gat bilip egensim Praim Minista O'Neill.

Mista Henao i tok ol Memba bilong Palamen i surukim sindaun bilong Palamen i go long Ogas 2.

Sir Salamo i wanbel long harim dispela kot long Julai 1 na i no ken abrusim Julai 27 bikos dispela keis i gat ol gutpela as long larim vot i no gat bilip i kamap.

Mista Henao i tok Oposisen i givim i go pinis mosen bilong kirapim dispela vot i no gat bilip egensim Praim Minista O'Neill, na Pemenent Palamentri Komiti long Praivet Bisnis i bin kisim dispela mosen pepa long Jun 7.

Dispela mosen pepa i makim Memba bilong Kandep and Oposisen Lida Don Polye i kamap nupela praim minista.

Sir Salamo i tokim Polye long givim afidavit pepa long Ateni-Jeneral Ano Pala, Palamen Spika Theo Zurenuoc, Deputi Palame Spika, Aide Ganasi na ekting klak bilong Palamen, Kala Aufa long dispela wik na i no ken abrusim Fraide.

Kot i tokim Mista Polye yet long kisim dispela afidavit pepa na givim long Zurenuoc, Ganasi na Aufa, o nogat Polye i kem putim

nuspepa notis long The National na Post Courier nuspepa.

Kot i tokim tu Zurenuoc, Ganasi na Aufa long failim notis long kamap long kot long lukim wanem ol samting i stap long dispela afidavit pepa.

Mista Henao i tokim kot olsem Mista Polye i laikim kot long toktok moa long Seksen 145 na skelim sapos dispela lo i ken larim Palamen i sindaun gen na vot i no gat bilip i ken kamap.

Sir Salamo i wanbel long harim dispela kot na givim disisen long Mande long neks wik.

Kombiu LLG kisim pawa saplai

PLANTI ol liklik ples na viles long PNG i no save kisim pawa saplai maski dispela kantri i pulap long planti risos b i l o n g k a m a p i m pawa.

Kombiu distrik long Rabaul LLG i kisim rurel ilektrifikesen long na ol manmeri long hap bai gat pawa saplai bihain long Memba bilong Rabaul,

Dokta Allan Marat, i kisim pawa saplai i go insait long dispela ples.

Dokta Marat i tok planti ol manmeri long ilektoret bilong em i bin askim pawa saplai na em i amamas olsem Kombiu LLG bai gat pawa.

"Dispela i soim olsem ol manmeri long ples bai baim pawa. Ol i mas gat pawa mita

long baim isi pei na kisim pawa.

"Ol manmeri i les long yusim mani nating long ol arapela samting. Ol i laikim pawa saplai na ol askim. Mi save olsem ol bai baim pawa gut na yusm dispela sevis.

BTK Electrical Limited i helpim ol manmeri long pulim pawa i kam insait long ples.

RESIS bilong kisim sia bilong Gavana bilong Hela we Anderson Agiru i bin dai na lusim, bai kamap namel long tupela Open Memba bilong Koroba Lake Kopiago na Komo-Margarima, Memba bilong Tari-Pori James Marape i tok.

Mista Marape, husat i Fainens Minista, i tok em yet bai hat long ran long dispela resis long kisim ples bilong pastaim Gavana Anderson Agiru bikos em i stap minista bilong stet.

Bihain long Gavana Agiru i dai, dispela sia bilong gavana i stap



Tari-Pori MP James Marape

nating na aninit long lo, wangepa man i mas kisim hariap.

Mista Marape i tok Memba bilong Koroba Lake Kopiago Philip Un-

dialu na Memba bilong Komo-Margarima Francis Potape bai resis long kisim dispela sia.

"Minista bilong Inta Gavman Rilesens bai givim wangepa edvais toktok long kamapim dispela bung bilong Provinsal Asembli we ol kaunsil Presiden i ken votim nupela gavana.

"Nupela provins bilong yumi i gat planti samting long mekim. Wangepa bikpela samting em long skelim long namel long benefit bilong PNG LNG Projek namel long Hela na Sauten Hailans Provin-

sal Gavman,"Mista Marape i tok.

Em i tok long brukim na skelim ol dispela benefit bilong PNG LNG Projek namel long tupela provins, Gavana bilong tupela provins i mass tap long mekim ol dispela wok.

"Mipela ol memba nating tasol yumi mas gat ol gavana long mekim dispela bikpela wok,"Mista Marape i tok.

Em i tok ol pipel na arapela ol lida i mas stap isi na stap long yuniti long larim dispela vot i kamap long Provinsal Haus ov Asembli.

Pay for Air Niugini Tickets via BSP Mobile Banking

Obtain a booking reference from Air Niugini website www.airniugini.com.pg, Call Centre on 180 3444 or any Sales Office prior to making the payment.

Dial *277# To Pay

Available to bmobile-vodafone & Digicel subscribers. Mobile service charges apply.



320 1212 / 7030 1212 - 24/7

servicebsp@bsp.com.pg

www.bsp.com.pg



No gat akwital bai no gat mani

OLGETA provins na distrik edministreta wantaim ol lokal gavman i mas bringim ol akwital ripot bilong ol i go long dipatmen bilong implementesen na rurel developmen pastaim long ol i ken askim long nupela peimen.

Sapos i no gat akwital, bai i no gat mani i go bilong ol sevis impruvmen program (PSIP, DSIP & LL-GSIP). Dispela em i lo aninit long Pablik Fainens Menesmen ekt.

Deputi Seketeri Program Implementesen Wing bilong Dipatmen, Mista Jackson Why i tokaut long dispela long taim em i kisim ol 2015 DSIP na DSG akwiital ripot bilong Raicoast distrik, Madang provins long Pot Mosbi las wik.

Mista Why i tok olgeta provins na distrik edministreta i gat wok long bringim ol akwital ripot bilong namba wan kwota bilong yia.

I gat mani mak moa long K17 milien bilong distrik na provinsal sapot gren (PSG/DSG) bilong 2013 i go 2014 insait long Dipatmen bilong Implementesen na Rurel Developmen (DIRD). Ol sek i stap yet bikos ol akwital ripot i no bin kam bek long DIRD opis yet.

Ol Provinsal Sapot Gren na Distrik Sevis Gren wantaim mani mak bilong K500, 000 wan wan hap em ol konstitusenel gren we olgeta wan wan memba bilong Palamen i save kisim aninit long diskreseneri



Memba bilong Raikos James Gau i givim ol 2015 DSIP/DSG Akwital ripot i go long DIRD Deputi Seketeri Program Implementation Wing, Jackson Why long Pot Mosbi las wik.
Poto: DIRD midia yunit.

na i no diskreseneri fan.

Long 2013 fiskal yia gavman i bin makim K55.5 milien long go aut aninit long dispela tupela hap bilong givim mani long ol memba tasol ol i bin baim K27.75 milien,

K19.75 i go long ol memba na narapela K8 milien mani i stap yet long sek wantaim DIRD bikos ol memba bai givim ol akiwital bilong ol mani ol i kisim pastaim bihain bai ol inap kisim nupela mani gen.

Mista Why i tok ol i rausim ol sekta alokesen bilong ol fans bikos long ol kain kain wok bilong provins na distrik wantaim ol LLG na tu em i no go gut wantaim ol monitoring wok bilong DIRD.

Wankain tu long 2014 fiskal yia, na 2015, gavman i makim K55.5 milien long wan wan distrik na ol provins. long wan wan yia. Tasol long ol tupela yia wantaim insait long K27.75 we ol i givim i go long ol provins na distrik, ol memba i yusim tasol, K18 milien long 2014 na narapela K9.75 milien long sek i bin stap yet wantaim DIRD. Long fiskal yia 2015 gen K17 milien tasol i go long ol memba na K10.75 milien i stap yet long sek bikos long ol akwital i no kam.

Ol dispela mani we i bin stap yet long DIRD em i go bek long stet olsem saplimenteri baset bilong las yia long 2015.

Long dispela as ol provins, distrik na LLG i no bin mekim wok inap long mak bilong, Dipatmen bilong Provinsal na Lokal Level Gavman standet.

"Hait pasin bilong yusim mani bilong pablik i save kamap long taim i no gat gutpela monitoring bilong ol projek na program aninit long sevis impruvmen," em i tok.

Long dispela taim tu, Memba bilong Raicoast, James Gau i tok long taim bilong givim 2015 DSIP akwital ripot bilong em, olsem i no olgeta distrik long PNG i wankain tasol sampela distrik i stap longwe tru na gavman i mas putim moa mani long mekim wok long tingting na driman bilong ol.

"Yu lukim distrik bilong mi long Raikos. Em i stap longwe tru na ples i no gutpela nogat rot na bikpela hap mani bilong mipela long DSIP i go long baim rot tasol, bikos mipela i haia long balus, long karim ol ikwipmen haia long ol bot long karim ol matiriel na ol ikwipmen i go long ol projek.

Na bihain em mipela i no gat wanpela samting moa i stap," em i tok.

Mista Gau i tok gavman i mas lukluk long apim mani mak bilong DSIP long wanpela yia long abrusim K10 milien we ol i save kisim nau na apim i go long K15-20 milien.

Kalabus ranawe long Jomba polis sel

James G. Kila i raitim

LONGPELA blakaut na bikpela tudak long bik moning las wik Fraide i givim gutpela sans tru long 51 kalabus long ranawe long Jomba polis stesin sel long Madang taun.

Madang polis stesin komanda, Sif Inspekta Vincent Isanda i tokaut long dispela long Tunde olsem polis inap long dispela taim i no holimpasim yet wanpela long ol dispela 51 lain husat i ranawe long polis sel.

Olsem na tok save i go aut long pablik long Madang taun i putim was na givim ripot long polis sapos yu i lukim nupela pes lain raun stap.

Dispela em namba tri taim long dispela yia tasol we ol kalabus lain i ranawe long Jomba polis sel.

Sif Inspekta Isanda i tokaut olsem namel long dispela 51 kalabus lain, planti long ol em polis i lokim ol bihain long ol i spak na wokim nabaut long strit.

Mista Isanda i tokaut tu

olsem foapela em polis i holim ol long sas bilong karim ol gan na katres. Antap long en tu wanpela long ol lain husat i ranawe em polis i holim em long sas long kilim indai arapela man.

Em i tokaut tu olsem Jomba polis nau yet i gat hevi long sait long gutpela banis arere long sel blok. Em i raitim leta pinis i go long Madang Semba ov Komes na Industri long helpim polis long putim strongpela banis rausim sel blok eria.

Moa long en tu Jomba

polis stesin i no gat stenbai pawa jenereta taim blekaut i kamap, na ol i askim ol bisnis haus na Madang Semba ov Komes na Industri long helpim ol tu long dispela.

Planti ol pipel long Madang taun i no amamas stret long kain pasin PNG Pawa Limited i wokim long no gat tok save bilong en long ol blakaut i kamap.

Stat long las wik yet i kam Madang taun na ol komyuniti arere long en i wok long bungim dispela hevi bilong blakaut klostu klostu na

blakaut i save stap longpela taim tru.

Ol bisnis haus husat i no yusim stenbai jenereta i kros tru long pasin PPL i mekim long no gat tok save bilong en pastaim long blakaut i kamap.

Ol manmeri long strit i kros tru bikos sampela long ol i save putim ol abus na kaikai long frisa long kol na stap, tasol blakaut longpela taim i mekim ol abus i bagarap.

Sampela i tokaut tu olsem blakaut long Madang taun i bringim prèt tu nau bikos long 51 kalabus lain i ranawe.

Wantok niuspepa i laikim ol eijen insait long Madang, Kimbe, Kundia, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: 325 2500 o Mobail namba: 7384 6688 o email i kam long: seovo@wantokniuspepa.com

Vele na Bakani go painim dinau mani

PAPUA Niugini (PNG) i laik kisim wanpela dinau mani ol i kolim Sovren Bond na i salim tupela bikman ya long go askim ol bikpela benk long Singapore, Boston na New York.

PNG i no bin kisim Sovren Bond bipo na dispela bai namba wan taim gavman bai kisim sapos ol toktok i kamap gut na ol bikpela benk i wanbel long larim PNG i kisim dispela dinau mani.

Ol ripot i tok gavman i laik

kisim wanpela dinau mani ol i kolim Sovren Bond na i salim tupela bikman ya long go askim ol bikpela benk long Singapore, Boston na New York.

PNG i no bin kisim Sovren Bond bipo na dispela bai namba wan taim gavman bai kisim sapos ol toktok i kamap gut na ol bikpela benk i wanbel long larim PNG i kisim dispela dinau mani.

Mista Bakani i tok PNG no sot long mani tasol gavman i

laik kisim dispela mani long kirapim ol arapela projek na kirapim ikonomi.

Mista Bakani na Mista Vele i bin traim long kisim wankain Sovren Bond long mun Epril dispela yia tasol sampela ol bikpela benk i no bin wanbel long givim.

Nau em i namba tu taim gavman i askim tupela man long go toktok wantaim sampela ol biknem benk long Singapore na Amerika.



Gavana bilong Sentral Benk, Loi Bakani

Sir Peter amamas long TPA opis stap long Madang

James G. Kila i raitim

BIKNEM bisnisman long Madang, Sir Peter Barter amamas long wok raun bilong Minista bilong Turism, Tobias Kulang long ol provins insait long kantri long sekim wok bilong turism.

Em i tok wokabaut bilong minista long ol provins long promotim wok bung namel long gavman na turism indastri lain em gutpela bikos wok bung tasol i ken strongim indastri long gro na go het.

Sir Peter i tok planti ol ovasis turis i save amamas long kam long PNG bikos long gutpela samting we yumi gat pinis olsem ol naispela pipel, gutpela nambis na bus bilong yumi na kalsa na pasin tum-buna na bilas we ol narapela kantri i no gat.

Em i tok bikpela samting we PNG i nid long stretim em ol infrastraksa olsem bikpela ples balus, rot na solwara transport, na tu

kantri i mas daunim ol hevi bilong lo na oda.

Sir Peter i amamas long Mista Kulang long miting bilong tupela long Madang tupela wik i go pinis. Insait long dispela miting, Minista Kulang i bin tokaut long opim rijonal Turism Promosen Atoriti (TPA) opis long Madang.

Minista Kulang i bin stap tu long nait long Fraide nait, Jun 10 long presentesen bilong Mis Madang Festival we ol bisnis haus i stap long kaikai na fan-raising we we ol i bungim K150, 000.

Sir Peter i tok olsem miting bilong em wantaim Minista Kulang i bin toktok tu long developmen bilong nupela Masta Turism Plen bilong Madang na Mamose rijon.

Madang em wanpela provins long kantri we planti ovasis turis i save go long en bikos long gutpela promosen long intenesenel maket em Sir Peter Barter na kampani bilong em Melanesian Tunist Sevis i save go pas long en.



Liklik meri Madang i amamas long lukim bikpela turis krus sip i sua long Madang. Poto: James G. Kila

NFA senisim taim gen long opim nupela Madang taun maket



NFA tokaut olsem PM Peter O'Neill bai opim nupela Madang taun maket long Julai. Poto: James G. Kila

JAMES G. KILA i raitim

INTENESENEL Fiseris Atoriti (NFA) long Tunde i salim strongpela tok save long stopim opening bilong nupela Madang taun fres prodius na fiseris maket em Madang Taun Meya, Joe Yama i plen long opim long asde (Trinde, Jun 22).

NFA, we i givim mani sapot long Japa Intenesenel Kopresen Ejensi (JICA) long kamapim dispela nupela Madang taun maket i stopim opening long kamap long asde (Trinde, Jun 22) bikos ol i laikim bikpela na stretpela program i kamap we i gat gutpela luksave na kala long en.

Moa long en tu dispela em wanpela bikpela projek insait long Madang provins na bikpela luksave mas kamap long en long politikal level long PNG na intenesenel luksave wantaim.

Menesing Dairekta bilong NFA, John Kasu i bin salim wanpela leta i go long Provinsal Edministreta bilong Madang, Daniel Alois long tok save long em long senisim taim bilong opim nupela maket. Dispela em bai long neks mun Julai, na Praim Minista Peter O'Neill wantaim Embaseda bilong Japan na ol bikpela lain bilong gavman bilong tupela kantri bai stap long sere-moni.

Madang taun meya, Mista Yama long las tupela wik i go pinis i bin toktok long NBC Redio Madang olsem em bai go het long opim maket long sevim ol pipel husat i wet longpela taim tru long go insait long nupela maket na salim ol fres kaikai. Tarangu ol manmeri nau yet i no gat gutpela ples long maket na ol i weit moa long tupela yia.

Plantu toktok i bin kamap long taim stret bilong opim dispela nupela Madang taun maket, we i lukim Memba bilong Madang na Minista bilong Transpot na Infrastraksa, Nixon Duban i tok PM

O'Neill bai opim long mun Me, tasol dispela i no bin kamap.

Bihain long dispela Madang taun meya, Mista Yama i tokaut long NBC Redio Madang olsem em bai no inap wetim Mista Duban o PM O'Neill long opim maket, na bai go het na opim long dispela wik Trinde (asde), em taim em yet i makim.

Tasol long dispela wik NFA i salim tok save bilong en long larim maket i stap inap program bilong opening i redi gut na bai lukim naispela kala i kamap na bikpela seremoni wantaim ol bikpela lain i stap long lukim maket i op.

NFA i tok olsem dispela nupela Madang maket projek em intenesenel ogenaisesen i putim bikpela milien Kina long kirapim, na sere-moni long wokim opisal opening bilong maket i mas gat kala long en long soim wokbung namel long PNG gavman na gavman bilong Japan.

NFA i tok taim gutpela ofisal opening i kamap em bai soim kala bilong wokbung namel long tupela kantri. Moa long en tu em bai bringim kamap pasin bilong wanbel na moa helpim i ken kam long ovasis long bihain long ol projek wok.

Mt Kare Gold Consultants laik baim gol

WANPELA nupela kampani bilong baim ol liklik gol i redi long mekim bisnis wantaim ol pipel bilong Hela na Enga provins.

Mt Kare Gold Consultants i laik helpim ol manmeri long Mt Kare, Porgera, Paiela, Kandep na Kompiam long Enga Provins long salim ol liklik aluvial gol ol i save kisim long wara na maunten.

Mt Kare Gold Consultants i laik tok save long ol manmeri bilong Pujaro, Pajaka, Pori, Awi, Koroba, Tari, na Tagali LLG insait long Hela Provins tu long redi long wokbung wantaim dispela kampani.

Wanpela wokman bilong Mt Kare Gold Consultants i tok dispela nupela kampani i laik baim ol liklik aluvial gol long gutpela prais na helpim ol manmeri long ples long mekim arapela bisnis wantaim mani ol i kisim long gol.

“Mipela i no bikpela kampani bilong kirapim bikpela maining projek olsem Porgera or Lihir. Mipela i liklik kampani bilong baim ol liklik aluvial gol.

“Mipela i laik statim bisnis wantaim ol manmeri o aluvial gol maina long Mt Kare, Porgera, Paiela, Kandep na Tari. Mipela i



laik helpim ol manmeri long dispela ol ples long salim gut gol long gutpela prais,” dispela maus man ya i tok.

Em i les long kolim nem bilong em bikos ol i statim dispela kampani long dispela yia tasol na ol i no pinisim sampela samting long larim kampani i operet.

“Dispela kampani i laik helpim ol manmeri i salim gol long gutpela prais. Na mani ol manmeri o aluvial maina i kisim i ken go long

samting,” maus man bilong kampani ya i tok.

Em i tok bikpela as tru long statim dispela kampani em long helpim ol pipel i senisim laipstail na larim ol i gat gutpela sindaun long ples.

“Dispela kampani em i bilong Enga na Hela yet. Sampela ol gol baia i save paulim ol manmeri long dispela ol ples na i no save givim gut mani.

“Mt Kare Gold Consultants i laik sevim gut ol pipel long ples. Mipela i laikim ol pipel long bilip long mipela bikos sevis mipela i laik givim long ol pipel em i gutpela sevis tru.

“Mipela i laik helpim ol manmeri long statim bisnis. Na bai mipela i helpim ol fri. Ol i no nap long givim wanpela mani.

“Mipela bai lainim ol long ol samting bilong mekim bisnis. Planti manmeri bilong yumi long ples i save laik ong mekim bisnis tasol ol i no gat save long mekim bisnis.

“Mipela i laik baim gol bilong ol, na baim long gutpela prais. Antap long dispela, sapos ol i laik long mekim bisnis, mipela bai helpim ol fri,” em i tok.

“Planti ol manmeri long Tari, Porgera, Paiela na Mt Kare i save long bisnis bilong gol. Tasol mipela i laik soim narapela kain we bilong mekim gol bisnis,” em i tok.

Dispela em i wanpela sans we Mt Kare Gold Consultants i laik givim fri sevis i go long ol kastoma bilong en.

Bikpela Mt Kare gold maining

projek tu bai kamap klostu taim tasol.

Dispela bisnis developmen tren- ing Mt Kare Gold Consultants bai givim bai helpim ol papagraun i stap gut na redi long mekim bisnis taim Mt Kare maining projek i stat.

Em i tok planti ol papagraun husat i no save long rit na rait, na husat i no save long mekim bisnis, tasol sapos ol i gat bikpela laik long mekim bisnis, ol i mas kam lukim Mt Kare Gold Consultants.

Sampela ol manmeri husat i save baim gol long Porgera, Tari o Wabag, na sapos ol i laik statim narapela kain bisnis, tasol ol i sot long save, orait Mt Kare Gold Consultants i stap long helpim ol.

“Mipela i no bisi long mekim mani. Bikpela as tingting em mipela i laikim ol manmeri long Hela na Enga long statim liklik bisnis.

“Mani ol i kisim long gol i mas karim kaikai, ol i no ken dring bia, pilai pokis o baim meri klostu klostu.

“Ol i mas inves long gutpela samting, na statim bisnis em i wanpela gutpela rot long senisim laipstail,” em i tok.



TribeFM Teen Ekselens Awot 2016 Nominetim ‘Teen Hero’ bilong yu

Yu save long wanpela yangpela man o meri husat i soim pasin bilong lidasip na save long planti wok insait long komyuniti?

2016 nupela TribeFM Teen Ekselens Awot bai selebretim 7-pela yangpela man na meri bilong olgeta hap bilong Papua Niugini, krismas bilong ol namel long 13 na 19 husat i soim olsem ol i gro o senisim pasin, lidasip na ol i gat komitmen long komyuniti ol i stap long en.

OL KATEGORI NA KRAITIRIA

Ol nomini i mas soim ol ko veliu bilong gro o senisim pasin, lidasip na komitmen.

HELT NA WELFE

Dispela yangpela man o meri bai soim olsem em i gat strongpela pasin bilong kamapim gut helt bilong em na bilong ol narapela husat i stap insait long komyuniti bilong ol wantaim ol ektiviti we i save strongim ol tingting na pasin bilong gutpela helt long ol skul, famili na ol komyuniti grup.

MUSIK NA ATS

Em bai soim olsem dispela yangpela man o meri i gat namba wan kain save na stail bilong ats na music na sapela taim em i yusim long kamapim senis insait long ol komyuniti bilong em.

SPOT

Dispela yangpela man o meri bai soim gutpela pasin bilong stap strong long spots na i pilai gut tru na em i yusim save na stail bilong em long kamapim gutpela sindaun long komyuniti.

KOMYUNITI

Dispela yangpela man o meri i soim olsem em i save tingim nid bilong ol narapela pipel pastaim long em yet, na em i save givim ol taim bilong em yet na strong bilong em long helpim komyuniti bilong em.

EDUKESEN

Dispela yangpela man o meri husat i soim olsem em i save mekim gut long edukesen bilong em o i kamap gut long skul bilong em, o husat i gat stori long em i save helpim ol narapela lain long lainim samting.

BISNIS NA INOVESEN

Dispela yangpela man o meri i mas soim olsem em i save painim ol nupela kain we bilong wokim samting na i mekim wanpela wok bisnis we i helpim em yet na komyuniti bilong en.

DISABILITI

Dispela yangpela man o meri i mekim senis long helpim ol lain husat i gat disability, na tu ol yangpela man na meri husat i gat disability tasol i wok long senisim laip bilong ol yet na bilong komyuniti tu.

WEI BILONG NOMINETIM MAN

Pulimapim dispela form wantaim olgeta stori bilong wanem yangpela man o meri yu laik nominetim. Sapos yu lusim sampela hap bai mipela i no inap kisim fom bilong yu.

Ol entri i MAS kam insait long 5 klok apinun long Fraide 22 Julai 2016.

Plis givim fom bilong yu i go long TRIBE 92FM long wanpela bilong ol dispela kain wei:

Salim pas: Tribe92FM, NBC, P O Box 1359, Boroko. Port Moresby, PNG.

Yu yet bringim i go long wanpela provinsal NBC OPIS klostu long yu

Salim long Fesbuk pes bilong TribeFM (salim wanpela poto bilong fom yu pulimapim pinis)

Salim long Whatsapp i go long 70199105 (salim wanpela poto bilong fom yu pulimapim pinis)

Yu ken ring long telepon namba 325 3439 namel long 8.30 moning taim i go long 4.30 long apinun, Mande i go Fraide o salim email long wgorogo@nbc.gov.pg.

NOMINETIM ‘TEEN HERO’ BILONG YU LONG NUPELA TRIBE92FM TEEN EKSELENS AWOT

Plis TIKIM WANPELA bilong ol dispela kategori long nominetim TEEN HERO bilong yu:



HELT NA WELFE



EDUKESEN



DISABILITI



SPOT



KOMYUNITI



BISNIS NA INOVESEN



MUSIK NA ATS

STORI BILONG NOMINI (Teen Hero):

Nem bilong em: _____

Adres bilong em: _____

Bon De: _____

Fon namba bilong em: _____

STORI BILONG NOMINETA:

Nem bilong em: _____

Rilesensip bilong Teen Hero bilong yu wantaim yu (papamama, tisa, Sios lida):

Adres bilong yu: _____

Fon namba bilong yu: _____

Long narapela hap pepa, tok klia long wanem as na Teen Hero bilong yu i mas kisim luksave long dispela yia Awot bilong TTEA. Pasim dispela pepa wantaim dispela fom.

Yu **MAS** soim klia ol **sampela eksampel** bilong soim wok we dispela yangpela man o meri i soim long gro bilong em yet, lidasip na komitmen long kategori yu wok long nominetim em.

Ol Lo bilong go insait:

- Em i op long olgeta lain i stap insait long PNG
- Krismas bilong ol nomini i mas stap namel long 13-19
- I ken nominetim ol grup/tim
- Ol nominesen i mas stret na i kam stret long yu
- TribeFM bai makim sampela lain long skelim na makim
- Sapos ol jas i lukim olsem i no gat gutpela lain long wanpela kategori, bai i no gat awot long dispela kategori
- Ol lain i stap long fainel mak bai kisim toksave long telepon
- Ol wina bai kisim awot/fainensel sponsasip we bai ol i mas yusim gen long wanem kategori ol i win long en
- Nem na poto bilong ol wina bai kamap long ol midia

Sapot i kam long:



Morobe Provinsal Gavman sapotim YWAM Medikal sip

MOROBE Provinsal gavman i soim gut-pela sapot bilong en gen long helpim wok bilong YWAM Medikal Sip wantaim K500,000.

Morobe Provins Gavana, Kelly Naru, i givim wanpela sek long mani mak bilong K500,000 long makim Morobe Provinsal Gavman na inapim tok promis bilong en long helpim YWAM Trening na Medikal Sip, MV YWAM PNG.

Gavana Naru i tok provinsal edministresen em i wanbel long patnasip bilong en wantaim YWAM Medikal Sip insait long Morobe Provins.

“Morobe Provins i gat bikpela populesen tru insait long Papua Niugini. Mipela i gat tausen viles i stap

longwe tru long ol solwara na long ol maunten we i hat long bringim sevis i go long ol.

“Mipela singaut long YWAM Medikal Sip long tingting long kam bek gen long Morobe Provins tupela yia i go pinis. Mipela i nidim helpim long go long ol komyuniti i stap longwe, na mipela i tenkyu tru long ol i wanbel long singaut bilong mipela,” Mista Naru i tok.

“MV YWAM PNG em inap long abrusim ol dispela kain hevi bilong kisim ol ples i longwe na em i karim ol saplai, ikwipmen na heltkea wokman na meri i go long provins bilong mipela we i hat long go. Em i bringim helt ke long provins bilong mipelai go long

narapela mak antap. YWAM tim i kamap patna na pren bilong mipela. Mipela kisim strong olsem mipela i gat sampela pren long helpim mipela long bungim ol hevi bilong mipela,” Gavana Naru i tok.

MV YWAM PNG i bin pinisim wanpeal raun bilong en i go long ol viles long Huon Galp solwara. Em i wok wantaim 19 morobe provinsal helt wokman na meri, na lukim 5,954 pipel i kisim heltke na

trening long 28 viles insait long 10-pela de bilong wokim ol klinik.

Ol wok long fil i karamapim 5,845 banis sut na marasin, 431 wok long ol tit, na 132 wok long stretim ol ai.

Wanpela bilong ol lain i kisim ai operesen em wanpela boi i gat 17 krismas, nem bilong em, Bray Bungewa, husat i lukluk gen bihain long tupela yia em i stap ai pas.

YWAM Medikal Sip Menesing Dairekta, Ken Mulligan, i tok sapot bilong Morobe

Provinsal Gavman i mekim ol long helpim kain lain olsem Bray.

“Em i patnasip bilong mipela tasol i mekim ol kain wok olsem long kamap.

Mipela i gat bikpela tenkyu long helpim bilong Gavana Naru na strongpela lidasip bilong en,” Mista Mulligan i tok.

Stat long yia 2015, YWAM Medikal Sip i bringim pinis 31,342 medikal sevis inap long mak bilong K2.5 milien long Morobe Provins.



Gavana bilong Morobe Provins, Kelly Naru i givim K500,000 sek i go long Dairekta bilong ol Medikal Sip, Ken Mulligan.

Wok bilong Divine Mercy i strong long Rabaul

WOK bilong Divine Mercy long Rabaul i wok long gro yet bihain long ol i strongim gen St Francis Xavier Kuragaga grup long pinis bilong mun Janueri long dispela yia. Cathy na John Paivu i raitim ripot bilong dispela prea grup long mun Februeri long tok save long ol prea lida bilong Rabaul Dineri, ol pris na siritual dairekta.

Namba wan Divine Mercy grup long Is Nu Briten i bin kamap long Kuragaga long 2001. Misis Fidelis Sipala i bin kirapim dispela grup long taim em i bin stap long Rabaul. Bipo em i bin stap long Mosbi we Misis Crecentia Anderson i bin statim Divine Mercy prea grup long 1991.

Cathy Paivu i bin wanpela bilong ol faipela meri husat i bin statim Divine Mercy Prea Grup long St Mary's Katedrel long Mosbi. Fidelis i bin joinim ol long 1993 samting bipo long em i go long Rabaul.

Cathy Paivu i go stap long Rabaul long 2000 na em i bin bungim Fidelis long Rabaul maket. Orait ol i pasim tok long selebretim namba wan pestode bilong Divine Mercy long Kuragaga. Ol pipel long ol ples longwe olsem long Gela Gela long stap insait long dispela lotu.

Ol i bin tok save long Katiket Dominic long kirapim wanpela prea grup long Sande Janueri 31. Ol i tok save tu long Pater Allen Casquejo, nupela pater bilong Filipins. Siaman bilong Peris Kaunsil Henry Funmat i tok save na bihain long lotu ol pipel i stap long kisim moa tok save na ol i kirapim prea grup long Kuragaga.

Astingting bilong kirapim dispela Divine Mercy grup em long:

Kirapim tingting bilong ol pipel long pre; wok bung wantaim Matupit, Malagunan na Nodup Divine Mercy grup, kisim ol yut autsait long taun long joinim grup; bungim ol pipel i gat save long ol rot bilong painim mani long ol program bilong bihain taim; Bungim mani long sapotim ol program long bihain taim na statim Buk bilong Pikinini program.

Ol mama bilong Kuragaga i strong long wok. Ol i save bung autsait long sios olgeta de na nau ol i memba bilong Divine Mercy, bai ol i wok bung wantaim Malagunan, Matupit na Nodup.



PABLIK NOTIS

TAMBU LONG RANIM “HI LO LOTERI”

Dispela toksave i go aut long olgeta pablik olsem pasin bilong pilai laki loteri ol i save kolim long **“Hi/Lo”** em i no bihainim lo, na lo i bin tokaut long dispela long de 14 bilong mun Februeri 2008 insait long **Nesenel Gaset Notis G22** na Nesenel Geming Kontrol Bod i wanbel olsem notis bilong gaset em i trupela aninit long *Seksen 5(3) bilong Geming Kontrol Ekt 2007*.

Bod i save long ol wan wan man na meri husat i wok long yusim ol Interim Oda bilong 18 Epril 2008 long ranawe long loa i holim pasim ol na kotim ol long ol i ranim yet ol gem bilong Hi/Lo. Tasol, dispela em bilong tok save long olgeta pablik olsem Interim Oda bilong 18 Epril 2008 em Waigani Nesenel Kot i bin rausim pinis long 19 Me 2008. Long wankain taim mipela i bin kisim tok save olsem i gat wan wan man na meri husat i bin raitim pepa notis na givim aut tok orait bilong ranim yet Hi/Lo gem.

Aninit long *Geming Kontrol Ekt 2007* Nesenal Geming Kontrol Bod em i **wanpela Gavman Bodi tasol we i gat pawa long kamapim lo na givim laisens bilong olgeta kain pasin bilong loteri gem aninit long lo bilong ol Loteri gem. Olsem na i no gat wanpela narapela Gavman Bodi long Nesenel na Provinsal level we i gat pawa long mekim dispela.**

Ol dispela wan wan man na meri i no gat rispek long lo bilong dispela kantri. Sapos mipela i painimaut long wanpela man o meri husat i wok long helpim ol lain long wokim pasin bilong laki we i brukim lo o em yet i wok long ranim loteri gem Hi/Lo, kot bai sasim em long baim kot fi long K5 000 o go long kalabus inap long 12-pela mun o tupela kain mekim save wantaim.

Long dispela as, mi laik singaut long olgeta lain husat i wok long ranim ol hait laki loteri bisnis bilong Hi/Lo long stopim na rausim olgeta Hi/Lo masin.

Sapos ol pablik manmeri i gat save long dispela kain pasin bilong pilai loteri i stap, plis toksave long opis bilong mipela long telepon namba 320 1907 o long feks namba 320 1908. Mipela bai haitim olgeta toksave bilong yu na i no inap tokaut long narapela.

Tok Orait i kam long:

Imelda Agon

Sif Eksektiv Opisa.



Rot bilong kamapim gutpela famili

PLANTI manmeri bai laik kamapim disaplin na gutpela famili tasol ol bai askim 'long wanem wei o rot mi inap save na mekim olsem?'

Planti bilong ol i laik save gutpela we long yusim na skulim pikinini bilong ol.

Na ol i laik bai pikinini bilong ol i mas amamas, i rispekim ol yet na narapela manmeri, inap long gat luksave long komyuniti na stap gut.

Nogat papamama i laik bai komyuniti i sutim pinga na tok em i no save 'skulim gut pikinini bilong em.'

Amerika Mental (het) Helt Asosiesen i luksave long tripela rot ol papamama i save yusim long skulim pikinini bilong ol.

Dispela ol rot asosiesen i tok sampela i gutpela na nogat.

Dispela ol rot em:

Papamama i soim laik bilong ol long pikinini na tokim em olsem ol laikim em. Tasol moa yet ol i givim fridom long pikinini long mekim ol disisen ol yet long pikinini i luksave long wanem samting i rait na wanem samting i rong na olsem ol i kamap wantaim gutpela ol disisen. (Dispela asosiesen i tok i gutpela.)

Namba tu rot em papamama i traim long soim olsem ol i bos. Long dispela papamama i givim fridom long pikinini long em i mekim ol disisen em yet tasol i no tokaut na soim klia laik bilong ol long pikinini. Toktok ol i mekim long pikinini em "bikos mi papa o mama yu mas harim tok bilong mi." (Dispela rot asosiesen i tok i no gutpela).

Namba tri rot em papamama i soim na tokaut olsem ol i laikim pikinini na givim olgeta fridom long pikinini long mekim samting long laik bilong ol. Moa yet ol i givim pikinini klostu olgeta samting pikinini i askim o i gat laik long em. Long dispela asosiesen i tok i no gutpela.

Dispela em ol rot Amerika Mental Helt Asosiesen i tokaut long em.

Tasol i gat ol narapela rot tu i stap. Dispela ol skul tok i stap long buk Baibel

Dispela ol skul tok i stap long Efesus 5: 22-33 we i no tok-tok tasol long rot bilong papamama i lainim pikinini long kamap gut tasol long wankain taim i tokim ol papamama long wanem samting ol i mas mekim long wanpela na narapela bipo long ol i ken skulim gut ol pikinini.

Namba wan tok i tok long mama i mas harim tok bilong papa olsem "Jisas i harim tok bilong Bikpela Papa o long sios i bihainim skul bilong Jisas. i olsem Jisas i het na sios i bodi bilong em na olsem sios i mas bihainim skul na tok bilong em."

Na long ol papa Aposel Pol i tok ol papa i mas soim laik bilong ol long ol mama wankain olsem "Krais i soim laik bilong em long sios (pipel) na i kisim pen na dai long sevim ol. Ol i mas laikim meri bilong ol olsem ol i laikim ol yet."

Yes, Pol i tok tru. Taim kain laikim i stap long papamama ol bai inap soim dispela laik long ol pikinini tu.

Efesus 6: 1-9 i tok, "Onaim papa na mama bilong yu- na olsem yu ken kamap na stap long laip."

"Ol papa yupela i no ken mekim ol pikinini i belhat tasol i mas kamapim na skulim ol long tok bilong Bikpela."

Skelim tingting i ting olsem sapos ol papamama na pikinini long Papua Niugini i bihaimim namba wan skul tok bilong Amerika Helt Asosiesen na ol tok bilong Pol long pas em i raitim long Efesus Sapta 5 na 6, em i bilip bai gat planti gutpela famili i stap long PNG. Moa yet dispela inap daunim planti hevi bilong loa na oda we kantri i wok long bungim nau.

Bogenvil selebretim AROB De long Mosbi



Kain stail, danis na singsing i bin kamap long AROB De long las Sarere. Foto: Wantok Fail

LAS Sarere Jun 18 i bin lukim planti lain Bogenvil man meri na ol pikinini na tu, ol poroman bilong ol narapela provins i bung na selebretim Atonomas Rijon bilong Bogenvil (AROB) de.

Selebresen i bin kamap long Konstitusenel Pak we ol i bin holim Melanisen Ats Festival long 2014 na

maski san i tuhat, dispela i no bin stopim planti grup long not, saut, sentrel na atols rijon i putim kamap ol kain stail tumbuna na kalserel tumbuna singsing na danis.

Sampela long ol we i save pulim planti lain long ole m Mambu ben, Solomon danis, Singsing kaur na Motlok naip danis.

Wanpela longpela taim ben bilong Sentrel Bogenvil, Auge Punks i bin pairapim music tu bilong em long dispela de.

Ol manmeri i bin amamas long lukim na stori wantraim ol wantok, hauslain na ol pren we ol i no save gat sans long bung insait long bikpela siti olsem P:ot Mosbi.

Dispela de tu i bin mekim ol lain Bogenvil long Mosbi siti i pilim olsem ol i bilong wanpela hap, ol i wanpela pipel na ol i gat wok long mekim long stretim na kamapim gut ailan bilong ol.

Ol selebresen i bin go gut tasol, nogat trabel na pinis long 5 kilok apinun.

Nupela Japan katun kamap long EM TV

WANPELA nupela TV program long EM TV bai pulim ai bilong ol liklik pikinini na tu, husat moa i save laik lukim ol katun.

Katun siris ol i kolim "Tico and Friends" o Tico na ol Poroman i bin kamapim namba wan program bilong em long EM TV long las wik Fraide, Jun 17.

EM TV i wok poroman wantaim Japan Faundesen na Nippon Animesen kampani long putim dispela katun TV siris long EM TV na ol pikinini na pipel long PNG i ken lukim.

Tico and Friendsem i stori long wanpela liklik pikinini meri, Namani, i gat 11-pela krismas na poroman bilong em, Tico.

Namani na papa bilong em, Scott, i bin kalap long sip ol i kolim Peperoncino long painim wanpela

narakain weil(whale) i gat nem taim yu lukim em i sain.

Taim tupela i raun, ol i lainim planti nupela samt-ing olsem pren namel long ol man na netja, na tu, luksave olsem ol poroman na famili i bikpela samting.

Wanpela stetmen i kam long Japan Embasi long Pot Mosbi i tok stat long dispela wik Mande, dispela siris bai save kamap long EM TV Kid's Kona program stat long Mande inap long Fraide.

Opis i tok siris ya bai kamap na skruim i go long mun i kam.

Opis i tok dispela em i namba wan taim long katun siris "Tico and Friends" i kamap long EM TV na PNG, na dispela i makim bikpela samting long wok pren namel long japan na PNG.



Embasi bilong Japan i bilip tu olsem ol pipel bilong PNG bai kisim kliapela save long laip na kalsa bilong ol pipel bilong Japan,

na promotim kalserel eksens na dispela bai skruim gutpela wokpren namel long PNG na Japan.

Baruni skul kisim hap sumatin saplai

Frieda Sila Kana i raitim

BARUNI Praimeri skul long Pot Mosbi Not Wes ilektoret i bin kisim hap saplai bilong ol sumatin skul saplai long mani mak bilong K5,147 aninit long Tusen Fi Fri edukesen polisi, long Mande dispela wik.

Dispela samting i bin kamap long bung wantaim namel long skul bod na Treid Pasifik Limited na i bin kostim skul olsem K5,147, we ol sumatin bai yusim long Tem 3 na Tem 4. Skul i no inap long baim olgeta samting we i mas stap insait long wanpela skul kit bikos ol i no kisim mani bilong ol yet. Hetmistres bilong skul, Irene Gaudi wantaim Bod i lukim olsem em i spesel nid bilong ol pikinini i lainim samting, olsem na ol i yusim sampela mani long edministresen komponen bilong skul na baim Treid Pasifik Ltd long redim dispela mekpas bilong ol sumatin.

Insait long mekpas we ol i bin givim ol sumatin long Mande na Tunde dispela wik em i kam long tupela hap, wanpela bilong lowa praimer i na narapela bilong ol apa praimer i skul sumatin. Insait long mekpas bilong lowa praimer i skul em i gat 7-pela ekseis buk i gat 64 pes, tupela pensil, wanpela raba na wanpela rula bilong wan wan sumatin. Wankain mekpas tu i go long ol

apa praimer i, tasol ol i kisim ol ekseis buk i gat 96 pes wantaim tripela pen, wanpela blak, wanpela ret na wanpela blu wantaim wanpela pensil na wanpela rula.

Hetmistres, Misis Gaudi i tok mani bilong maitirel komponen i no kam tasol em i lukim olsem ol i mas mekim samting long ol sumatin i ken skul gut. Olsem na em i go long Treid Pasifik na askim ol long prinim ol buk na pensil wantaim logo na kala bilong skul yet long ol sumatin i ken amamas long soim olsem ol i bilong Barunim Praimeri Skul.

Misis Gaudi i tok sampela matiriel bilong skul em i baim pinis long Theodist steseneri long stat bilong skul yia we ol tisa na sumatin i wok long yusim nau.

Em i bin tromoi moa long K10,000 long baim sampela besik samting bilong skul pinis long Theodist na ol narapela steseneri stua long stat bilong skul yia. Misis Gaudi i tok em i kisim dispela tok stia i kam long opis bilong edukesen olsem na ol i yusim edministresen fan long mekim.

“Insait long kain hatpela taim olsem we mani i sot, olgeta samting yumi kisim em yumi mas lukim olsem blessing bilong yumi. I no long mani tasol, no gat.

Blesing long ol samting olsem ol buk, pensil bilong skul na tu ol pipel

olsem Treid Pasiifik husat i kam long helpim yumi taim yumi gat mani problem long TFF,” Misis Gaudi i tok.

Baruni Praimeri Skul i gat 400 sumatin long gret 3 i go long gret 8 wantaim 20 tisa, 12-pela man na 8-pela meri. Ol tisa tu i bin kisim ol rekot pepa bilong ol pikinini na ol papa-mama i sainim long taim ol i kisim ol matiriel bilong ol.

Man i makim maus bilong Jeneral Menesa bilong Treid Pasifik, Albert Moide i tok klia olsem, Treid Pasifik i no kisim wanpela mani bilong TFF i kam long gavman long mekim ol dispela kain wok. Dispela em i laik bilong ol skul yet na ol skul i baim ol long wokim ol buk, na ol narapela matiriel wantaim kala na logo bilong skul yet.

“Gavman i putim K206 milien bilong tusen Fi Fri Polisi; 40 pesen i go long Edministresen, 30 pesen long Tisim na Lainim na 30 pesen long infrastraksa. Infrastaksa mani i no kamaut yet bikos ol i wok yet long stretim lo bilong givim aut dispela hap mani,” Mista Moide i tok.

Em i tok tu olsem ating neks yia bai gavman i putim aut tenda long ol kampani i aplai long mekim wok bilong tusen fi fri skul matiriel deliveri.

Ol sumatin i soim amamas bilong ol wantaim ol danis ol i mekim.

Gutpela teknoloji bilong daunim korapsen

Frieda Sila Kana i raitim

SIR Dokta Puka Temu, Minista bilong Pablik Sevis na Pesenal Menesmen i gat bilip olsem gutpela teknoloji inap long helpim pablik sevis long bosim na monitaim gut wokabaut na wok bilong ol pablik sevan olsem ol tisa.

Tupela sampela i bin kamap long kirapim tingting bilong em long painim rot long holim ol pablik sevan i stap gut long ol wok ples bilong ol.

Wanpela stori em long wanpela liklik skul long ilektoret bilong em long Abau we em i bin go lukim ol pikinini i bin sanap lek nating long graun na singim nesenel entem gut tru na bihain ol i tokaut long nesenel to promis. Taim em i lukim dispela i brukim bel bilong em.

“I luk olsem ol dispela pikinini i wok long tokim mi olsem, Sir Puka Temu, plis tingim mipela na tokim ol tisa bilong mipela long kam bek long skulim mipela,” Sir Puka Temu i tok.

Narapela em long taim em i bin lukim wanpela



Dokta Sir Puka Temu, Minista bilong Pablik Sevis na Pesenal Menesmen. Foto: Frieda Sila Kana.

mama long ilektoret bilong em we i bin gat bel inap long siksipela mun na i kamap long etpos wantaim sik malaria, tasol komyuniti helt woka i no stap na em i go bek long ples. Em i no kisim malaria marasin.

Dispela meri i kisim ol marasin bilong bus na i kamap orait na i no dai, na em i karim gut bebi. Maski yumi stap long Nesenel Kepital tu we olgeta sevis i stap klostu tasol, olsem wanem na ol tisa i no save kamap long klas long skulim ol pikinini? Olsem na yumi mas

painim wanpela rot.

Dokta Sir Temu i tok em i go na painim ALESCO sistem i kam insait long Pablik Sevis long stretim wok bilong en long lukim kaikai bilong mani gavman i tromoi long kamapim long ol wok bilong ol pablik sevan.

“PNG tude i nidim nupela teknoloji long stretim wok. Yumi no inap kalap long namba 1 na i go stret long namba 10, no gat. Long 2002 Minista Temu i bringim dispela sistem i kam insait na nau em i go insait long Edukesen dipatment.

“Edukesen em i ki bilong laip we gavman i givim mani long ranim. Edukesen em i bikpela samting tru na tisa wok em i wanpela wok i gat bikpela ona long en. Mi bilip olsem dispela teknologi bia helpim long daunim pasin bilong korapsen.

Ol pipel bilong Papua Niugini nau i wok long lainim ol trening pailot long ranim ol balus. Mipela i amamas long edukesen sistem bilong yumi. Gutpela edukesen bai helpim nesen long sanap resis insait long globol maket long human risos,” Sir Puka i tok.

Tasol 15 yia bilong mi i stap insait long politik, PNG em i no plai yet. Balus bilong PNG i stap ran yet long kolta bilong ples balus na i no tek of yet. Ol pablik sevan i mas gat laikim bilong kantri bilong ol na komitmen long mekim gut wok.

Tripela samting mi save lusim wantaim ol sumatin taim mi save go long ol skul em; bilip long God, bilip long yu yet na bilip long kantri bilong yu. Nau mi lusim dispela toktok wantaim yupela ol tisa na ol pablik sevan.

Fri edukesen bai klostu kamap lo

MINISTA bilong Edukesen, Nick Kuman las wik i bin tok klostu taim bai O'Neill gavman i pasim wanpela lo bilong Fri Edukesen o TFF, we ol gavman i kamap bihain bai bihainim long baim skul fi bilong olgeta wan wan pikinini husat i go long elementeri skul inap ol i kamap long gret 12.

Minista Kuman i mekim dispela toktok long taim em i go long Menyamya Distrik wantaim lokal memba, Benjamin Philip, we em i bin opim ol nupela skul bilding bilong Menyamya Teknikal Vokesenel Edukesen Trening Senta.

Mista Kuman i bin go wantaim lokal memba, long lukim ol wok we i kamap long sapot bilong Tuisen Fi Fri edukesen (TFFE) infrastaksa komponen bilong gavman i go long sapotim wok bilong Teknikal Vokesenel Edukesen Trening (TVET) insait long distrik. Ol dispela fasiliti i kostim K340, 300.



Minista Kuman na Menyamya MP Benjamin Philip opim nupela vokesenel skul edministresen bilding.

“O'NEILL-Dion gavman bai go insait long 2017 nesenel ileksen wantaim ol bikpela polisi bilong em olsem Tuisen Fi Fri Edukesen,” Minista Nick Kuman i tok.

Em i tok, fri edukesen em i bikpela polisi bilong dispela gavman, tasol wantaim ol arapela bikpela polisi olsem, fri na sabsidais helt ke sevis, infrastaksa developmen, lo na oda na helpim long mekim ikonimi i gro bi-

long.

Pastaim long em i opim edministresen bilding na ol haus slip bilong ol sumatin meri long Menyamya Vokesenel skul, Mista Kuman i tok TFF polisi em bilong helpim olgeta pikinini i mas go long skul, na long wankain taim em bai helpim ol papa na mama long ol i no ken karim hevi bilong baim skul fi.

Em i tok olsem insait long las tripela o foapela

yia, PNG i lukim bikpela developmen i go daun olgeta long ol distrik.

Bihain long dispela Minista i opim Menyamya Vokesenel Skul edministresen na domitori bilong ol sumatin meri. Memba bilong Menyamya, Benjamin Philip wantaim ol opisal bilong Morobe provinsal edministresen na distrik opis i bin stap long witnesim dispela ol bilding i op.



Hetmistres, Irene Gaudi (hankais) wantaim BOM siaman, Yori Tom i sekhan wantaim Albert Moide bilong Treid Pasifik na kisim namba wan bokis bilong ol TFF matiriel. Foto: Keith Ani – Treid Pasifik.

Kisim save na mekim

Stat long dispela wik long dispela seksen, Meri Pes bai putim kamap ol toktok i kam long “Save na Mekim” buk ol Melanesia Kaunsil ov Sios i kamapim.

Stori bilong dispela buk

Sampela manmeri ol i save mekim kain kain wok bilong helpim ol arapela manmeri long ol i ken kirapim ples na gutpela sindaun bilong ol.

Orait, long Epril 1975 ol Melanesia Kaunsil bilong ol Sios (M.C.C) i singautim ol dispela kain manmeri long bung na toktok long wok bilong ol. Planti manmeri ol i bihainim dispela singaut na ol i kamap long Lae ples bilong bung. Namba bilong ol i winim wan handet.

Ol i kam long olgeta hap bilong Papua Niugini. Man bilong wanpela hap bilong Papua Niugini i stori long wok bilong en na man bilong narapela hap bilong Papua Niugini i kirap nogut na i tok: Olaman, kain wok olsem mi laik traim tu.

Tok i go i kam, i go kam, na miting i pasim tok olsem: Yumi mas kamapim wanpela buk bilong helpim tingting na save bilong yumi.

Miting i pasim dispela tok na i givim wok long Peter Hale wantaim David Williams. Peter Hale em i wanpela didiman bilong gavman, na David em i wanpela pasto bilong Yunaitet Sios na i wok long Melanesia Kaunsil bilong ol Sios.

Tupela i laik kamapim buk, tasol tupela yet i no laik raitim, Nogat! Tupela i salim tok i go long olgeta hap bilong Papua Niugini long husat i bin traim sampela wok pinis na i laik wokim stori bilong dispela wok bilong en.

Planti manmeri ol i harim dispela singaut na ol i raitim stori bilong sampela wok bilong ol na salim i go long tupela. Tupela i stretim na bungim na kamapim wanpela buk long tok Inglis. Em i kamap bikpela buk, tasol tupela i kolim LIKLIK BUK. Long wanem, planti liklik stori na ripot i stap insait long dispela buk.

Moa long neks wik.

Florikalsa So long Goroka

Loutova Siapea i raitim

OL florikalsa fama, planti bilong ol em ol meri i bin kamapim tripela de florikalsa So long Goroka, Isten Hailans long wik i go pinis.

Dispela So i bin pulim ol mama i am long 8-pela distrik long provins na ol arapela provins tu olsem long Wes Nu Briten provins.

Victoria Narere em i wanpela long ol meri husat i bin bringim ol flawa na okid bilong em i kam na putim aut tu long So i tok, “Florikalsa o bisnis bilong groim ol flawa na salim em i bikpela bisnis we planti ol man na meri long PNG i no save long en.”

Em i tok, em i bin traim dispela bisnis long taim emi i stap long ples long Wes Nu Briten



Wanpela meri i aigris long ol naispela waitpela okid long florikalsa So long Goroka las wik.
Foto: Siapea Loutova

long 2010.

Long 2013 em wantaim famili bilong em i muv i go antap long

Goroka, na bihain long tripela yia, em i go het long strongim dispela wok bilong florikalsa

long wanem, em i luksave long bikpela veliu bilong dispela bisnis.

Meri long SME i mas gat databes

Frieda Sila Kana i raitim

Target Women Empowerment Faunda na Dairekta, Lucy Siki Aiya, em i wanpela mama husat i laik strongim lidasip bilong ol meri long bisnis na komyuniti.

Em i laikim wanpela databes i mas kamap long holim nem na stori bilong ol meri husat i gat sampela liklik bisnis long maket o kes krop long komyuniti.

Misis Aiya bilong Musau long Kavieng, Nu Ailan nau i gat wanpela SME ogenaissen bilong ol meri, Target Women Empowerment. Misis Aiya i painim aut olsem planti meri nau i stap

long wokim ol liklik na namel sais (SME) bisnis tasol ol i no rejistaim ol liklik bisnis bilong ol. Em i tok, dispela em i pasim rot bilong ol meri long kisim helpim long ausait long kirapim strong bisnis bilong ol.

“Gavman i putim K20 milien long Nesenel Developmen Benk bilong ol meri long wokim bisnis tasol planti meri i no gat rot long kisim hap bilong dispela mani. Bilong wanem ol rot bilong kisim ol dispela kain mani long NDB na ol arapela komesel na Maikro fainens benk em i hatwok tumas long ol mama long ples na long ol taun setelmen.

Lucy i laik statim wok

wantaim ol lain bilong em yet long Kavieng ilektoret wantaim Target Women Empowerment ogenaissen we bai helpim ol mama long senisim ol bisnis prodak bilong ol i go i kam na helpim ol yet. Em i laik kamapim wanpela liklik maikro fainens long ol mama inap long kisim kain mani inap long K5,000 na i go daun long statim na strongim ol liklik bisnis bilong ol. Tasol bikpela hevi i stap long ol gavman ejensi olsem, IPA we ol i no gat gutpela rekot o databes bilong ol meri. Misis Aiya i statim wok pinis long traim long kamapim kain databes tasol em bai long ilektoret bilong ples bilong em

long Kavieng pastaim.

“Mi laik kirapim wok wantaim ol mama long ples long kisim trening bilong lukautim ol mani na bisnis wantaim sampela hap bilong dispela K20 milien we PNG gavman i makim bilong mipela ol mama,” em i tok.

Nau yet dispela grup i no gat wanpela kapital mani tasol ol meri long Kavieng i amamas na bel kirap long lukim dispela maikro fainens projek i stat long helpim ol.

Misis Aiya bai stat long wokim ol fanresing long Pot Mosbi long helpim ol meri long Kavieng pastaim na bihain taim em i kisim sampela moa mani bai ol inap go long ol narapela ilektoret long Nu Ailan provins na long ol narapela provins. Namba wan fanresing wok em long salim ol tiket bilong K200 dis kaikai long Julai 2, na bihain bai go long ol narapela fanresing aktiviti olsem danis na kopret dina kaikai.

Misis Aiya i gat ekspiriens long wok wantaim ol meri long Lihir Ailan aninit long mani bilong NewCrest Maining long holim wanpela wik trening we 72 meri i greduet wantaim setifiket bilong SME Kopresen, pastaim SBDC long 2012. Bihain em i bin go long Kuala Lumpur, Malaysia long lukim wanem kain wei, gavman bilong Malaysia i save sapatim ol pipel bilong em long gat

ol strongpela SME.

“Ai bilong mipela i op long lukim kain wei bilong gavman bilong Malaysia i helpim ol pipel bilong ol wantaim ol SME. Olsem na long 2013 mipela i bung long Madang na kamapim wanpela SME Polisi we Praim Minista yet i bin kisim draf. Mipela askim Praim Minista long kamap siaman bilong dispela SME bikos long Malaysia, Praim Minista bilong ol yet i siaman bilong SME,” Lucy i tok.

Long Februeri 2016, Praim Minista i bin lonsim SME Polisi tasol i no gat wok i kamap yet long dispela bikos long gavman i gat mani problem. Wanpela bilong ol polisi em olsem g olgeta liklik na namel sais bisnis we olgeta mani bilong ol i stap long mak bilong K10 milien na i go daun, em gavman i mas lusim bilong ol Papua Niugini sitisen tasol na no ken givim long ol ausait lain.

Narapela bilong ol polisi em long askim gavman long putim mani mak bilong K200 milien olgeta yia long wok bilong SME na ol narapela sevis olsem edukesen. Insait long dispela wok, Misis Aiya i gat strongpela tingting yet olsem em i mas kirapim databes bilong ol meri. Em i bilip bai sampela lain i helpim em long kamapim dispela.

Moa stori long Target Women Empowerment bai kamap long neks mun.



Lucy Siki Aiya, Faunda bilong Target Women Empowerment i bin go long KL, Malaysia wantaim Maria Kalap, bilong SME Kopresen long 8-10 Jun, 2016.



Sampela bilong ol 72 mama long Lihir husat i bin kisim trening long Lucy Siki Aiya long yia 2012 i soim ol SBD setifiket bilong ol.

Lokal memba i givim embulens

Loutova Siapea i raitim

MEMBA bilong Obura/Wonenara, Mehrra Kipefa i kam gut nau long helpim ol sik lain na ol pipel long ilektoret bilong em.

Em i wokbung wantaim Evanjelikel Bratahud Sios (EBC) helt sevis na givim wanpela nupela len krusa embulens i go long mekim wok bilong bikipela Kassam rurel haus sik long Isten Hailans.

Long taim em i bin givim ki bilong ambulens i go long bod siaman bilong Isten Hailans Provinsal Helt Atoriti (EHPHA) Malcolm Smith Kela, em i tok, "Helt em i bisnis

bilong yumi olgeta wan wan, olsem na opis bilong mi i mekim helt em i olsem bisnis bilong mipela wokbung wantaim EBC sios we mipela bai i ken helpim na sapotim wok em i mekim long givim helt sevis i go long ol pipel bilong O-wan", Kipefa i tok.

Em i tok amamas tu long opis bilong gavana Julie Soso na Isten Hailans provinsal gavman wantaim ol arapela patna husat i save givim han long sapotim dispela nupela haus sik. Projek i stat long 2012 i kam inap long dispela yia we em bai open dua bilong em na bai kirapim wok long Julai mun i kam bihain.

Bilding seketeri bi-

long EBC helt sevis Japalis Kaiok i tok, long kirapim kain wok em i no isi, long wanem, planti taim wok i save stop bikos mani i save sot.

Em i tok amamas olsem wok bilong haus sik em i go het bikos long sapot bilong lokal memba Mehrra Kipefa.

Antap: Memba bilong O-Wan Mehrra Kipefa i givim ki bilong embulens i go long Bod siaman bilong EHPHA Malcolm Smith Kela.

Daunbilo: Nupela ambulens bilong EBC Kassam haus sik.

Ol poto: Loutova Siapea



Nupela jenerata long helpim ANGAU

ANGAU Haus sik i gat nupela jenereta bilong givim gutpela pawa saplai long haus sik long taim bilong givim ol bikipela sevis.

Nupela 500kVA jenereta, we bai ol i sanapim long Gware haus long givim bekap pawa long ol bikipela wok bilong haus sik olsem sejeri o operesen, intensive ke, eksiden na imejensi na haus sik famesi.

Austalia gavman i bin givim dispela jenereta long mani mak bilong K600, 000, wantaim sampela nupela tenk bilong holim fiul. Ol i wokim dispela jenerta long em inap long ran inap long 12 aua wantaim wanpela 10 pesen ova lot mak.

Sif Eksekutiv Opisa bilong ANGAU haus sik, Dokta Christopher Kenyhercz, i mekim tok welkam olsem, nupela jenereta bai helpim haus sik long gat gutpela pawa saplai bilong wokim ol klinik operesen.

"Nau mipela i gat wanpela gutpela jenereta long kisim ples bilong olupela jenereta we mipela i save swisim long han taim i gat blakaut.



Nupela jenereta bilong ANGAU haus sik.

Taim nupela jenereta i wok, mipela bai sevim planti laip," Dokta Kenyhercz i tok.

Australia Hai Komisina Minista Kaunsela Ben David, i tok bikipela wok i kamap pinis long stretim ANGAU.

"Gutpela pawa saplai we i no save dai em i bikipela samt-ing long wok bilong wanpela bikipela haus sik long nau. Dispela nupela jenereta bai sapotim ol wokman na wokmeri bilong ANGAU long

kamapim gutpela wok stret," em i tok.

Em i wanpela hap bilong helpim i kam long Gavman bilong Australia long stretim ol infrastraksa bilong ol bikipela sevis long ANGAU haus sik.

Kamap Winman na givim blut

PASIFIK Intenesenel Haus sik i holim wanpela de bilong ol winman i givim blut long Sarere 18 Jun wantaim bikipela toktok, "Kamap Winman – Givim Blut na sevim tripela laip" kempein.


Long dispela de 45 volantia i bin kamap long givim blut na bihain long sekim ol blut, ol i makim 27 long ol i orait long givim blut. Olgeta i bin kisim PIH Blut Dona Kat, PIH Setifiket bilong Tok Tenkyu, PIH Beg, dring na kaikai wantaim PIH 'Hero' T-Siot. Ol wokman na wokmeri bilong PIH yet tu i bin givim blut pas olsem eksampel.

Dispela kempen i bin kamap long nupela han bilong Visen Siti Mol na ol medikal tim i bin stap long PIH Klinik long Visen Siti (graun plua, klostu long ka pak aninit long haus). Dokta Jonathan Oblefias, PIH sif patolojis i toktok long radio long sanel 89.9 FM long helt tok so "Geda Tamona" long Jun 16, we em i bekim sampela askim i kam long sait bilong givim blut.

Jeneral Menesa bilong Maketing long PIH, Mista Yogi i tok, "Em i wanpela gutpela sain bilong ol pipel bilong PNG i soim trupela spirit bilong dispela kantri. I gat 45 pipel insait long 4-pela aua em i narapela kain samt-ing olgeta. Tim bilong mipela i putim planti hatwok long mekim dispela kamap na mi amamas long gutpela kamap bilong en," em i tok.

Givim blut em i wanpela gutpela wei bilong lusim sampela hevi long bodi. Donesen bilong wanpela man inap sevim tripela laip. Em i wanpela helti wei bilong dona bilong blut tu bai stap gut na abrusim planti ol bikipela sik.

PIH em i bikipela praivet haus sik bilong Pot Mosbi na em i save givim 14 speselis na teknoloji na gutpela ikwipmen we ol i save yusim long helpim heltke long PNG.



SEMINA

WANPELA program bilong selebretim 50 Yia Asdaiosis bilong Pot Mosbi– mipela i wokim sampela semina o skul bilong Social Teaching of the Church o ol Sotel tising bilong Sios. i gat komplek i kamap long self-study insait long Pot Mosbi Daiosi i tok “Planti manmeri i no klia tumas long Social Teaching bilong Katolik Sios”.

Olsem na Late Pater Michael Igo i bin statim dispela semina las yia.

Namba wan skul bilong semina em “Rait bilong marit na famili” we Pater Michael Igo i bin go pas long en long wan wan Dineri insait long Pot Mosbi Asdaiosis.

I gat 4-pela Dineri i stap insait long Pot Mosbi Daiosis. Tripela Dineri i stap insait long siti olsem na em isi long ogenaism semina. Ausait long siti i hat liklik olsem na inap tude, ol i no kisim semina yet.

Bihain long Pater Igo i dai, mipela i stopim dispela skul. Bihain mi i gat laik long go pas long dispela semina na olsem, mi bin statim namba wan semina long 21 Me 2016, i go long Dineri 3. Tasol ol i no salim planti manmeri i kam. i gat 11-pela tasol i bihainim semina.

Long de 4 June 2016, taim bilong Dinari 2. Ol i bin salim planti i kam. Ol 60 manmeri i kam long dispela semina. Long de 18 Jun 2016, semina long Dineri 2. i lukim 46 manmeri i bin joinim semina.

Het Tok bilong semina namba tu em “Life and Dignity of Human Person”. Insait long dispela skul i helpim yumi long tingim olsem olgeta manmeri bilong dispela graun i gat DIGNITY.

Dispela digniti i no kam long narapela manmeri o ol i givim. Dispela Digniti i stap long yumi i no hatwok bilong yumi. Tasol GOD YET i PUTIM INSAIT LONG YUMI WAN WAN TAIM EM i MEKIM YUMI KAMAP. Bikos God i mekim yumi bihainim piksa bilong em yet. Olsem na yumi olgeta i mas rispektim narapela narapela na no ken bagarapim laip bilong narapela.

Insait long semina tu, mipela i bin lainim sampela salens i kamap insait long dispela graun long traim bilip bilong yumi: olsem Abosen, Kilim man indai (death penalty), Humen trefiking, prostitusen, domestik vailens na planti moa.

Long taim bilong serim na grup diskasen, planti i bin tokaut klia olsem, ol i no save situesen i gutpela tumas. Dispela semina i kirapim ol long slip na opim ai long lukim salens i stap insait long Sios.

Wanpela bilong ol i bin tok olsem: “Yumi save olsem planti samting nogut i kamap insait long sios bilong yumi, komyuniti bilong yumi na kantri bilong yumi.

Olgeta i bagarapim Humen Dignity bilong yumi. Tasol Yumi olsem Katolik manmeri i stap olsem maupas manmeri. i no gat lei manmeri i opim maus na tok klia long pablik o long midia olsem dispela i no stret.

Dispela semina i givim yumi strong na no ken pret moa long autim samting i no stap stret na bagarapim digniti bilong yumi manmeri. Yumi lei manmeri i mas kamap strong na autim stret. Sapos yumi i pasim maus, husat bai stretim? Olsem wanem pasin bilong manmeri bai senis?”

Narapela semina long social Teaching bilong Sios bai kamap bihain gen. Bikos i gat 7-pela topik bilong Social Teaching of the Church i stap. Mipela i bin lainim tupela topik tasol. I gat 5-pela topik i stap yet.

Long dispela stori mi laik tokaut strong long yumi olgeta: “Yumi mas kamap strong long autim wanem samting i rong na korektim em.

Sapos yumi i no autim samting i no stap strer o rong nau, em bai kamap strong moa moa yet na manmeri bihain tu i lusim tingting, na kisim em olsem samting i stretpela. O long tok English yumi tok: “We make WRONG become RIGHT, and RIGHT become WRONG”.

No ken mekim kamap olsem LO samting i NO STREPELA.

Matupit Ailan i kisim helpim long Divain Mesi grup

John Paivu i raitim

DIVAIN Mesi Divosen grup-long Rabaul Dineri i bin kari-maut wanpela spesel wok marmari i no save kamap bipo, i go long ol lain long Matupit Ailan, Is Nu Briten Provins.

Bihainim wokplen bilong em, 5-pela prea grup bilong laWakaka, Kuraip na Ramalmal long Not Kos, Raluan long Burma rot na Rakival long Watom Ailan i bin kisim i go na givim ol kaikai diwai bilong ol lain long ailan long planim. Em ol yangpela diwai stik na saka olsem banana, tapiok, taro, singapo, muli na popo sid, buai, rop daka, aibika stik, pitpit, valangur kumu na ol narapela moa.

Ol i bin karim ol dispela

samting i go long Matupit long tripela de stat long Sarere Me 25 inap long de namba 27, Mande.

Ol Matupit Ailan pipel i bin gat bikpela amamas long kisim ol diwai krop o samting bilong planim, na ol lida i bin dilim i go long 4-pela grup bilong Katolik populesen long en.

Ol Matupit pipel i bin askim long ol keskrop olsem buai na stik daka.

Askim i go long ol grup we i no bin givim ol samting long donetim kontribusen bilong ol bikos ol pipel i laikim stret ol yangpela diwai o stik long planim long kaikai na long salim tu.

Dispela em wanpela bikpela

program bilong Mesi Wok o wok marimari bilong pre na mekim samting long en long dispela Yia bilong Marimari.

Mesi projek i bin kamap bihain long lukluk na glasim ol i wokim taim ol kodineta bilong ol divosen i bin raun i go long hap.

Namba tu Mesi wok bai kamap long dispela Sande long Nodup sab peris.

Ol bai wokim dispela prea de o divosen long de bilong selebretim pestode bilong Santu Peter na Paul.

Long dispela de tu, ol bai wokim tumbuan kalsa danis na singsing ol i kolim long Warlapang.

Ol bai wokim tripela ofaring long dispela taim.

Wanpela em bai go long Pater long ol pastorel wok em i save mekim, Warlapang na ol ofaring bai go long stretim ruf bilong sios i gat bagarap long en na narapela bai go long nomol Sande ofa.

Divine Mesi grup i pulim ol lain long ol kain wok olsem ol ensinia, ol saientis, tisa, bisnis menesa, nes, tredsman, ol eks benk woklain, ol leksera, ol spotman meri, na ol arapela.

Long las bung bilong ol long Jun 11, ol i bin tok orait na kamapim wanpela grup, ol i kolim long Divain Mesi Profesenel.

Wok bilong ol em long helpim wantaim wok bilong sios na tu, ol i ken helpim husat lain i painim wok.

Ol pikinini kisim Sakramen bilong Konfemasio



Stori na Poto: Anna Solomon

1. Wasmama i sanap baksait long pikinini i kisim sakramen bilong konfemasio.



2. Pikinini i nildaun na wetim Asbisop Ribat long putim han antap long em.

LONG Sande 19 Jun, ol pikinini bilong Sen Peter Chanel Praimeri skul long Erima, NCD i bin kisim Sakramen bilong Konfemasio.

Asbisop John Ribat bilong Pot Mosbi Asdaiosis i bin go pas long dispela lotu na i givim sakramen long ol.

I bin gat plani papamama na ol famili na pren i kamap long lotu na amamasim dispela bikpela de bilong ol yangpela pikinini.

Asbisop Ribat i tokim ol yangpela long sanap strong long bilip bilong ol na bihainim lotu Katolik long laip bilong ol.

Ol i tokim ol long no ken lusim ting long marimari bilong God long laip bilong ol oltaim, na long holim strong pasin bilong pogivim ol lain i mekim rong long ol. Em i tokim ol tu long soim marimari pasin long ol arapela manmeri long komyuniti na kantri.



Bihain long lotu, ol famili i amamas na sanap kisim poto wantaim Asbisop John Ribat.

Palamen i mas givim taim bilong harim ol ripot

PALAMEN bai i bung gen long mun Ogas long toktok long ol bikpela samting bilong kantri. Tasol i gat planti ol bikpela samting olsem ol ripot, i stap yet we ol memba i no bin paitim toktok long en bikos ol i no bin gat inap taim.

Tripela bilong ol dispela bikpela ripot em Interim ripot bilong Helt Sekta Manesmen, Fainel ripot bilong Helt Sekta Manesmen, na namba tri em Watpo 2013 Liv Pe bilong ol Tisa i bin kamap leit.


Siaman bilong Spesel Palamen Komiti bilong Pablik Sekta Rifom na Sevis Deliveri, Bire Kimisopa i tokaut long dispela wik olsem komiti bilong em i putim aut ol tupela ripot bilong Helt Manesmen long ol pablik i ken lukim bikos i gat bikpela hevi bilong sik TB i kamap nau. Em i no bihainim pasin bilong wetim ripot i go pastaim long Palamen na bihain tokaut long ol pablik. Em i tok ol dispela ripot i bin redi pinis tasol palamen i no bin givim sans long em i putim ripot i go long ol memba i ken harim.

Mista Kimisopa husat i memba bilong Goroka, i tok ol i bin putim dispela ripot long ol Notis Pepa bilong Palamen tasol i no gat taim long ol memba i harim ripot na paitim toktok. Mista Kimisopa i bin tok save olsem ol dispela ripot bai kamap long taim Palamen i bung long mun Mas, tasol dispela i no bin

Er, Mista Bire, yumi teblim dispela helt ripot long palamen pastaim o yumi go stret long pablik...

Putim ripot long niuspepa we ol pablik ken lukim.. Palamen em bisi tumas long sampela isu.!

Oda! Oda! Mista spika! Mi laik.. Giaman!!



kamap. Orait ol i traim gen long taim Palamen i bung long mun Jun, tasol nau Palamen i sotim taim bilong bung, olsem na ol dispela ripot bai stap nating.

Gavman yet i bin kirapim dispela komiti bilong skelim sapos gavman sevis i kamap long ol pipel o nogat. Narapela wok tu em long givim edvais long gavman long ol rot bilong stretim gut pablik sekta. Kantri i lusim bikpela mani long komiti i mekim dispela wok bikos long ol komplem i kamap long ol pipel.

Sapos gavman i tok tru long stretim ol dispela hevi, orait em i mas larim komiti i givim ripot bilong en long Palamen na bihain i ken go aut long ol pipel.

Dispela kain pasin i no nupela. Planti taim, bihain long ol bikpela hevi i kamap long kantri, gavman i save makim wanpela komiti long mekim wok painim aut na karim ripot i go bek long palamen. Komiti i save mekim wok, tasol Palamen i no save hariap long kisim ripot na luk-save long ol rekomendesen i

stap insait long ripot.

Ol i larim ripot i sindaun nating i stap longpela taim bai i no gat samting i kamap. Mekim olsem na ol pipel bai tok gavman i lusim mani nating na no gat wanpela gutpela samting i kamap.

Pasin bilong Palamen long isi isi tumas long paitim toktok long ol ripot i save hatim bel bilong pipel. Sapos dispela pasin i kamap oltaim, bai ol pipel i no gat bilip moa long gavman. Ol bai tok gavman i kirapim nating

komiti long pasim maus bilong pipel. Samting tru em gavman i no gat intres long painim aut as bilong ol hevi na painim rot bi-long stretim.

I no gat narapela lain i gat pawa long kamapim ol senis. Palamen tasol i gat pawa long wokim lo o kamapim ol senis long wok bilong gavman.

Olsem na sapos Palamen i no hariap long harim ol toktok bilong kain ripot olsem, bai i no gat wanpela gutpela senis i kamap. Olgeta samting bai i stap olsem na ating bai inap kamapim moa hevi yet.

Laip bilong dispela Palamen i wok long sot nau.

Long taim ol memba i kam bek bung gen long mun Ogas, bai i gat wanpela bung moa long mun Novemba na bai dispela yia 2016, i pinis.

Long neks yia 2017, las bung bilong Palamen bai kamap long mun Mas na bihain long en, bai ol memba i kirap i go nabaut long statim kempein bilong 2017 Nesenel Ilekseen.

Olsem na mobeta ol bikpela ripot, na ol lo na ol arapela bikpela samting i stap yet long Notis Pepa bilong mitng bilong Palamen, i mas kamap ples klia na ol pipel bilong kantri i ken lukim. Mekim olsem bai ol pipel i luksave olsem gavman i harim tru krai bilong ol na i kamapim tru wok bilong stretim hevi na kamapim gutpela senis.

Yumi manmeri i piksa bilong God

YUMI wan wan manmeri i piksa bilong God. Wanem samting yumi mekim, o ol toktok yumi tromoi long arapela i mas soim rispek na laikim pasin bikos God i stap insait long yumi wan wan.

Dispela ol stia toktok em i hap bilong wanpela semina i bin kamap long Asdaiosis bilong Pot Mosbi long las wiken bilong ol Katolik manmeri bilong Dineri 2. Man i go pas long givim dispela semina em Pater Paul Luwin SVD. Samting olsem 46 manmeri bilong Dineri 2 i bin kamap long dispela semina na Pater John Willio, MSC i bin opim.

Het tok bilong dispela semina em The Principal of Life and Human Dignity. Pater Liwun i skruim dispela wok bilong givim ol semina insait long asdaiosis bihain long man husat i bin kamapim tingting bilong ol dispela semina, Pater Michael Igo i dai. Ol dispela semina i bilong helpim ol



Ol manmeri i sindaun long ol liklik grup na toktok.
Ol poto stori Anna Solomon

Katolik insait long Mosbi Asdaiosis long strongim bilip bilong ol na kamapim gutpela senis long peris bilong ol long dispela 50 yia aniveseri bilong Pot Mosbi Asdaiosis. Aniveseri

selebresen i bin stat long 13 Novemba 2015 na bai pinis long Novemba long dispela yia.

Pater Paul i bin go pas long dispela semina bilong tupela



Pater John Willio MSC i opim dispela semina.



Mausmeri bilong wanpela grup i autim tingting bilong grup.

Dineri grup pinis na long Dineri 2, ol lain bilong St Peter Chanel Erima, Sacred Heart Hohola, Holy Rosary na Sacred Heart Hohola i bin kamap.

Flot na tumbuna singsing bilasim Madang Festival

James G. Kila i raitim

MADANG Festival i lukim gen ol flot o pasin bilong bilasim kar na promotim ogenaesisin na prodak long pablik i kam bek gen long taim bilong Madang Festival long Sarere, Jun 11, 2016.

Ol pipel long Madang taun i amamas long lukim ol kar i bilas nais tru na ran long rot na promotim ol prodak na koporet ogenaesisin na ol institusen.

Maski sampela lain i sindaun nating long sait long tok olsem festival i no kamap orait long tingting bilong ol yet, planti lain i tok em naispela festival we ol turis o lain i kam long ovasis na tu ol manmeri bilong arapela provins i go long Madang long lukim.

Wanpela wait-meri turis bilong Yurop i pilim amamas tru long taim em i go holim kundu na spia bilong ol lain 'nimbem' bilong Simbai, taim ol i samsam i stap wantaim stail bilas na kangal bilong ol we i gat ol grinpela binatang.

Taim wait-meri bilong Yurop i holim spia bilong ol Simbai na laik samsam wanpela kain filings tru kisim wait-meri em na em i rausim ol kolos bilong em na danis skin nating. Yupela, ating pawa bilong ol 'nimbem' bilong Simbai i mas kisim em krangk stret ating.

Madang Festival komiti siaman, Leo Berka i tokaut olsem 2016 Madang Festival em kamap long traim senisim nem nogut Madang i wok long kisim long sotpela taim i go pinis. Dispela em bikos long hevi bilong lo na oda na tu moa pipel i muv i go long Madang na kamapim moa setelmen arere long taun.

Mista Berka i tokaut olsem ol komiti i kisim mani long geit bilong festival olsem long mak bilong K53,000.

Em i tokaut olsem mani ol i kisim long geit long festival bai go wantaim koporet sponsa mani , K40,000 na K100,000 i kam long Madang provinsal gavman.

Em i tokaut tu olsem Mis Madang Festival kwin resis fan reising i bin kamapim K115,000 we moa long 400 manmeri i bin baim tebol na go lukim kontes long Madang Risot Hotel.

Ol manmeri long Madang i amamasim Kwins Betde wiken gut tru bikos nogat trabel i kamap long Madang Festival.

Sande i lukim biknem musik man bilong Madang, Demas Saul i pairap long Laiwaden

Oval wantaim biknem musik man bilong Solomon Ailan Sharzy. Ol manmeri i skin kirap stret long danis na soim stail bilong ol tasol ol polis i tokim ol long stap isi tasol na no ken danis na harim musik tasol.

Wanpela Madang Festival komiti memba, John Maripal i tok long pastaim tru flot em wanpela program we ol edukesenel institusen na ol bisnis haus i amamas long putim. Dispela em i kamap longpela taim bihain long taim bilong Maborasa Festival long bipo.

Maripal i tok dispela yia flot long Madang Festival i nais tru bikos olgeta edukesenel institusen olsem Madang Teknikol Koles, PNG Maritaim Koles na tu Tusbab Sekenderi skul i kamapim ol flot bilong ol bilong ol.



PNG Pawa wokman wok long pawa-lain long flot



PNG Maritaim Koles soim naispela flot bilong ol.



Nesenel Dvelopmen Benk (NDB) tu soim stail bilong en long flot.



Haus morota stret ron long rot long Madang.



BIKPELA TURIS SIP: Wanpela mama bilong Rabaul taun i soim bikpela sip bilong ol turis i kam pas long bris. Ol save lukim ol dispela bikpela sip olgeta mun.



SAMTING BILONG AIGRIS: Tupela lapun turis i lukluk long ol samting ol mama bilong Rabaul i salim long sait bilong rot long bris.



AIGRIS: Wanpela turis meri i aigris stret long bilum bilong Sepik.



NAISPELA PLES: Sampela bilong ol turis i raun long rot long Rabaul taun.



Ol poto: Nicky Bernard

MAUNTEN PAIA: Sampela bilong ol turis i raun go antap long maus bilong maunten paia.

Turis Sip save go long Rabaul olgeta mun

Nicky Bernard i raitim

Rabaul long Is Nu Briten Provins save welkamim ol turis sip long olgeta mun taim ol save kam sua long bris long Rabaul.

Olgeta ol turis long wol save flai go long Sydney, Australia na kalap long ol turis sip we save sel i go long ol Pasifik Ailan.

Taim kalenda bilong turis sip save kamap bai sip i lusim Sydney na kam olsem long ol Pasifik Ailan, olgeta turis manmeri long wol save kisim balus na go long Sydney long redi long kalap long sip long sel long ol Pasifik Alian.

Rabaul em namba wan ples turis sip save go sua long en bipo long ol narapela ples long Pasifik turis sip save go long en.

Long las mun wanpela bikpela turis sip i go sua long bris long Rabaul na moa long 5,000 manmewri bin stap insait long dispela sip. Planti bilong ol dispela turis em lapun manmeri we ol i laik lukim ol ples bilong Wol Woa 2 we i bin kamap long Rabaul. Na i no bilong woa tasol ol i laik kam lukim nogat, sampela i laik kam lukim volkeno o maunten paia i bin pairap long 1994 na bagarap Rabaul taun.

Rabaul na Kokopo taun i senis liklik nau long wanem ol turis save go in na aut klostu klostu long wanem olgeta samting bilong Wol Woa 2 i stap yet. Long Kokopo i gat planti ol tanel o hol ol Japenis bin digim i stap yet na nogat senis bilong em inap nau. Rabaul tu i gat sampela ol Japan tanol na bikos ol turis save go klostu klostu ol papa graun long Rabaul i bilasim gut tru ol rot na mekim simen bilong ol trus long go insait na lukim ol dispela tanol.

Long sait bilong bris we sip bilong ol turis save kam pas, ol manmeri na pikinini save salim ol nekles, bilum, klos na kain kain samting we ol turis bai laikim na baim.

Ol pipel bilong Is Nu Briten save long wanem taim ol turis bai kam pas long bris na ol save redim ol yet long welkamaim ol na salim ol samting ol mekim long ol.

Bikpela samting nau long Is Nu Briten em, ol memba mas wok bung wantaim long stre-tim rot na klinim ol samting bilong woa we ol turis bai isi long go lukim.

Rabaul na Kokopo taun em klin na klin oltaim oltaim na dispela em no gat problem long klin bilong dispela tupela liklik taun bilong Is Nu Briten.



KLINIM GUT: Wanpela bilong ol tanol bilong Japan long Wol Woa 2: Ol pipel na memba mas klinim na lukautim gut bilong ol turis long go kam na lukim.

Kumul Meri bilong Morobe i winim Vocal Fusion



Ol 4-pela wina wantaim host Daren.



Tehillah Ben'Oba



Fidelish Metta

Nicky Bernard i raitim

BIKPELA TV kampani bilong PNG, EMTV i givim moa long K85,000 i go long 4-pela wina bilong Vocal Fusion long Sande taim ol i holim Gren Fainel long klap Cosmopolitan long Mosbi.

Vocal Fusion em i wanpela resis EMTV i save kamapim long painim ol yangpela manmeri long soim talen bilong ol long singsing. Na em save ran klostu long tripela mun olgeta.

Moa long 40 yangpela manmeri long Alotau, Kavieng, Popondetta, Lae na Pot Mosbi i bin go insait long dispela resis.

Dispela em i namba tri sisen bilong Vocal Fusion i kamap, na wina bilong dispela sisen tri i go long Kumul Meri bilong Morobe, Tehillah Ben'Oba.

Tehillah, i bilong Popondetta tasol em wantaim famili bilong em i stap long Lae long Morobe Provins longpela taim. Em i wanpela sumatin bilong TAFE tasol taim Vocal Fusion i kamap long Lae long painim ol yangpela manmeri bilong soim talen bilong ol long singsing, em i bin go na traim.

Dispela tingting bilong em long traim nek bilong em i karim kaikai. Em i no pundaun long stat bilong Vocal Fusion inap em i kam long gren fainal na win.

Vocal Fusion i pinisim sisen 3 bilong ol wantaim 4-pela strongpela na yangpela manmeri wantaim stail nek bilong ol taim ol i sanap long stes na singsing long ai bilong ol sponsa na ol bik manmeri. Ol 4-pela i singim tupela singsing, wanpela long laik bilong ol na nara-

pela long laik bilong ol jas.

Ol Sas na Vocal Fusion i givim namba tri rana ap i go long Gregory Bai bilong Pot Mosbi wantaim sek mani long K5,000 namba tu rana ap i go long boi Alotau, Isiah Monoa, wantaim K10,000 na namba wan rana ap i go long meri Kerema bilong Mosbi, Fidelish Metta, wantaim K20,000. Na kumul meri bilong Morobe yet i kisim top awod na K50,000 sek mani.

EMTV na Vocal Fusion bai redi gen long kamapim sisen foa na yu husat yangpela i gat gutpela nek bilong singsing i mas redi nau long putim nem taim sisen foa laik kik ov.

MNL na EMTV i tok tenkyu i go long olgeta sponsa bilong ol long kamapim dispela Vocal Fusion we i bin pinis gut tru long Sande Nait.




Isiah Monoa



Gregory Bai

Em nau! Ol pikinini i ken painim rot i go long ples wantaim Wantok lain...



C F R M N O D Q P Q A C O P D R P V M
E O M E R P A T B E N C A B T E S G E
P R P P H I E R E F I N S C I L
M Z F N B A I G L E T T O L U A D O N

PAINIM WOD PILAI

<i>Ol wod lista:</i>	GARAWA	NOGAT	SITIM
	HELPIM	ODA	STRETIM
AINANGA	KALABUSIM	PAIRAPIM	TELIPON
BASTAT	KROKROK	PINISIM	TUMORA
BOMIM	LEMANET	PULAPIM	WANHAUS
DRAM	MAMBU	RIGEL	WOKBOI
EKSAMPEL	MUMUTIM	SANPEPA	YANGPELA

F P F F J R L S P J E T E L I P O N E S O K N W V
F F N M O P A N V U U U K A L A B U S I M M O E E
A N W R H S S S E F L O S C I I E S G R T C F E A
H T O K E B C S U D R A E E T R U T H L L R H E S
K O K Q K A B D A K G A P S Y A N G P E L A R D F
T D S T W S I R O N I H I I H P A G P M L X U W H
S A D A C T Z R A E P L O N M I B M P A V P I N I
P Y R I N A K N P V Y E A D W M A E S N G M I U X
M A I Y E T I A S U M W P M O S N T J E I U B M N
G F S A G A C E X G Q E V A K J A M D T U M O R A
E E I R Q T O I M M O P S E B G I D E I A U Y G Q
R M S T G T L N I E D G F A O T N R T M R T M E D
R F N E A Q N M F P N C R N I O T A A N R I G E L
E S C E N K O T A L R E H S O S O M C D S M N A O
E T A Y L B H I Z W J W G C X U V N R I F O E B I
S I A U I S I O P N H E X E J V E A N A G S N I T
S D I X F L V V C A E T I X N I E I E I B E Y O N
Q F R H S P D O T C N B L T D G P Z R E E S U V Q
L C C L I D K O G R O S A X D G D I T U S J C C B
F E K R L E O C N S E V A D L C D C S N S M S M E

STORI BILONG TUMBUNA

Yu no mas indai

Wanpela meri i bin stap klostu long maunten Mungaol. Em i bilong bipo tru, i no nau. Dispela taim i no gat wanpela manmeri long dispela hap. Dispela meri, em tasol i sindaun, haus na gaden bilong em i klostu long dispela maunten tasol, i no longwe.

Nau wanpela taim bikpela mama bilong san i kamap. Na dispela meri i wok i stap insait long gaden bilong em, na wanpela samting i pairap insait long liklik bus klostu long dispela gaden na meri i bin lukluk go bek, na wanpela naispela yangpela man i kamap.

Na dispela meri i pret nogut bikos em i no save sindaun wantaim wanpela man. Na em i no toktok, pasim maus, na lukluk tasol long dispela man. Na dispela man i kamap klostu moa long meri na han bilong em i go insait long bilum bilong em na kisim liklik abus bilong kapul i stap long bilum.

Em i kisim na givim long dispela meri na i tok: “Meri, yu kaikai dispela abus na bihain bai yu gat bel. Tasol mi bai inap kam bek gen long faivpela de bihain tasol. Sapos yu painim wanpela pikinini, orait, bai yu no ken givim susu long em. Karim em i kam antap long het bilong dispela maunten Mungaol, na bai yu inap long painim wanpela haus man i stap antap long het tru bilong dispela maunten ston. Yu opim banis bilong dispela haus i go insait na maski long opim dua stret. Yu mas sanap arere long dispela haus.” Em i tok olsem na em i go. Bihain long faivpela de, dispela meri i kisim bel pinis na em i karim wanpela pikinini man. Orait, dispela meri i bihainim tok bilong man na karim pikinini i gop antap long dispela maunten na painim dispela haus man. Orait, na em i no givim susu long pikinini, em i hangamapim em nating long arere bilong haus na wetim dispela man i stap.

Em i wet i go inap long belo na

pikinini i krai nogut tru. Orait nau meri hia i pilim nogut na tingting planti. “Olanan, longtaim mi wet i go na man i no kamap. Tasol sapos mi wet moa, bai pikinini i dai.”


Em i ting olsem na givim susu long pikinini. Dispela taim tasol man i kamap antap tru long maunten. Em i holim tupela botol wara long tupela han wnataim. Wanpela botol wara i ret na wanpela i wait. Orait em i no kamdaun yet. Em i stap antap tru long maunten na singaut strong tumas.

Na singaut planti taim moa olsem: “Laip bilong i stap oltaim, laip bilong i stap oltaim,” planti taim moa. Tasol bihain em i hatwok na singautlong laip i pinis long dai. Em i singaut olsem, na meri i tok “Yesa.”

Orait, dispela man i kros nogut tru na em i kapsaitim wara antap long dispela maunten ya na kamdaun nating na tok: “Meri, yu givim susu pinis long pikinini a?” Mi bin tambuim yu pinis. Tasol laik bilong yu yet, yu givim susu long pikinini. Orait, pikinini bilong yu bai em inap long kisim taim nogut. Na dispela em i rong bilong yu yet. Man i tok olsem na em i kisim gutpela strongpela banara i stap insait long haus na em i taitim na givim long meri wantaim pikinini na skruim tok bilong em olsem: “Nau tasol mi laik mekim gut long pikinini na mi kisim kaikai bilong em i kam, tasol rong bilong yu i givim susu long em.”

Orait, bihain bai mi kam stretim tok wantaim pikinini bilong em. Tasol nau em i ken karim planti pen na kisim taim nogut. Em i tok olsem na soim wanpela nupela gutpela ples long meri. Meri i lukim na planti moa gutpela pikinini ol i pilai i stap long amamas wantaim na painim gutpela kaikai tasol i stap. Na man i tok: “Sapos yu no bin bagarapim pikinini bilong yu, mi inap long salim em i go namel long ol. Tasol yu bagarapim em pinis na mi i go. Bihain bai mi kam kisim em.” Em i tok olsem na i go. Dispela meri i no lukim em moa.

Ansa bilong Wod Pilai isu 2179





TOK PISIN NEWS

from Radio Australia

radioaustralia.net.au

Harim TOK PISIN long Radio Australia

101.9FM

Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

UPNG sumatin loya i putim kot aplikesen

Sam Seke i raitim

LOYA bilong ol sumatin long Yunivesiti bilong Papua Niugini long dispela wik i mekim wanpela ejen aplikesen long kot long rausim muv bilong UPNG long ol sumatin i mas sainim wanpela agrimen.

Agrimen ya em long ol sumatin i mas tok sapos i laik go bek long klas o nogat. Sapos ol i no laik go bek long klas na gohet wantaim strai, orait, ol i mas raus long skul.

Loya Laken Aigilo i tok dispela agrimen i egensim rait



Ol UPNG sumatin i protes ausait long kempas.

bilong ol sumatin aninit long mama lo bilong Papua Niugini long protes.

Taim mi toktok wantaim

em long bik san tude, Mista Aigilo i putim pinis aplikesen long kot, na em i wet yet long kisim bekim bilong kot.

PNG Atoni Jenerel bipo i tok polis i gat nem nogut

SIR Arnold Amet i tok Papua Niugini nau i gat kalsa bilong vailens na emi wok long kamap strong moa moa yet.

Wanpela Sif Jastis na Atoni Jenerel bifo blong Papua Niugini i tok kalsa bilong vaiolens long kantri nau i strong moa moa yet na em i askim bai ol polis i mas gat bikipela trening long sait bilong Humen Rait long stopim Polis brutality o pasin long paitim nogut ol man.

Sir Arnold Amet i mekim dispela toktok bihainim pasin ol polis i bin mekim long sutim ol sumatin long PNG Yunivesiti i no long taim i go pinis.

Em i tok tu olsem, em i no bilip tumas long ol wok painimaut we Polis na Praim Minista i laik mekim long deispela trabel namel long



Ol PNG polis i rausim ol setelmen pipel long Pot Mosbi.

Polis na ol UPNG sumatin we ol polis i bin wok sutaut long UPNG kempas.

Sampela sumatin i stap yet long haus wantaim ol bagarap oi bin kisim long trabel wantaim polis.

Ol dispela sumatin long geta yunivesiti i wok long laikim Praim Minista Peter O'Neill long lusim pastaim

wok long en, bihainim ol tokwin bilong korapsen.

Planti komyuniti lida wantaim ol politisen i wok long askim olsem Praim Minista i mas lusim pastaim wok bilong en, na sapos kot i painim olsem em i no bin mekim korap pasin, orait emi ken kisim bek wok bilong en.

Ol Solomon Ailan mama i kisim trening long lukautim pik

Caroline Tiriman i raitim

LAIN bilong Kastom Gaden Asosiesen i bin givim pik treining long ol meri bilong Are Are long Malaita Provins.

Ol mama bilong tupela komyuniti long Are Are long Malaita provins long Solomon Ailan nau i save gut long lukautim ol pik bihainim wanpela trening em ol lain bilong Kastom Gaden Asosiesen i bin givim ol.

Wanpela mansave bilong Poltri na Laipstok, Peter Haio i bin givim trening long Rokotanikeni Women Asosiesen bilong Saut Malaita long ol gutpela we bilong lukautim gut ol pik na salim aopos ol i laikim mani.



Ol pik long wanpela fam long Australia.

Planti long ol dispela meri fama i save lukautim ol pik bilong ples na tu ol pik bilong ol narapla kantri o Yuropien pik.

Wankain olsem ol narapela kantri long Melanesia,

pik em i stap olsem waneplai impoten animel long ol pipel bilong Solomon Ailan.

Ol Melanesia pipel i save iusim pik long planti samt-ing, olsem kastom na tu bilong salim long kisim mani.

Wari long Vanuatu populesen i go antap

OL sif bilong Vanuatu i lainim ol nupela we bilong helpim kantri i daunim namba bilong ol pipel o populesen long wanem, em i wok long go antap tumas.

Ol i tok namba bilong ol pipel i save go antap long wan wan yia winim ol narapela kantri long Pasifik rijon, na dispela i kamapim bikipela wari long gavman, ol NGO grup na tu long ol komyuniti lida.

Nau lain bilong Wan Smol Bag Tiata kampani i wokbung wantaim Sif long traime daunim dispela wari.

Ol opisa bilong Wan Smol Bag i givim pinis ol woksop o trening long ol sif long Sanma na Shefa provins we Port Vila i stap long en long ol kain samtung ol famili



Ol pipel bilong Vanuatu.

plening na riprodaktiv helt.

Charleon Falau bilong Wan Smol Bag Tiata Kampani i tok ol woksop i bin

kamap gut, tasol i bin gat sampela wari tu long kalsa we i save tambu long ol pipel i toktok long seks.

Planti sumatin long Goroka Yuni i kisim bagarap

Sam Seke i raitim

SAMTING olsem 50 sumatin bilong Yunivesiti bilong Goroka i bin kisim bagarap long pait we i bin kamap long yunivesiti kempaslas wik, na sampela long ol i stap yet long haus sik wantaim bikipela bagarap.

Dairekta bilong Isten Hailans NBC Provinsel redio, Agnes Inape i tok pait i bin kamap namel long ol sumatin yet.

Em i tok planti long ol

sumatin i laik bihainim tok bilong Yunivesiti Kaunsel na go bek long klas.

Tasol Mis Inape i tok sampela long ol i laik long gohet long sapotim ol lain bilong UPNG long Pot Mosbi we i laik long go het na i no go long klas.

Na long taim ol sumatin long Goroka Yunivesiti i wok long pait i stap, ol lain we i bin stap long traime long stopim ol pait na lukautim ol propeti, em ol haus lain long graun we yu-

nivesiti i stap longen.

Wanpela long ol em i Koni Sari husat i pastaim meja tu bilong Goroka taun.

Em i tok sampela long ol as ples pipel tu i bin kisim bagarap taim ol traime long stopim ol sumatin long pait.

Mista Sari i tok bikipela wari bilong ol tu em long lukautim yunivesiti propeti, we ol i lukim olsem onli bikipela institusen bilong PNG gavman long Isten Hailans provins.



Ol Goroka Yuni sumatin long haus sik.

Kempein long Inglan i stap wantaim EU o lusim i go het

...Stap wantaim EU i gat moa sapot



Ol lain i holim plak bilong Briten na Yuropien Yunien (EU) long taim Inglan i holim referendum vot long stap wantaim EU o lusim EU i bin kamap long Palamen Skwea long London long las wik Trinde.

KEMPEIN long vot Inglan i lusim EU o stap wantaim, i go het nau bihain long wanpela man i bin sutim dai Palamen memba Jo Cox. Cox i gat 41 krismas na em i yangpela politisen na mama bilong tupela pikinini.

Ol opinion pol o ol lain i glasim referendum vot i tok ol samting i soim olsem vot long stap wantaim EU i wok long go pas nau na wanpela samting ol i lukim i wok long pulim sapot em dai bilong yangpela meri politisen Cox husat i bin strongpela sapota bilong Inglan i no ken lusim EU.

Dispela referendum vot we Inglan i laik wokim long

bruk lusim EU i wanpela bikpela samting insait long politikal histori bilong kantri long planti ya.

Bikpela samting long tupela sait em long ol lain i sapotim stap wantaim EU vot, ol i lukluk long ikonomi we i ken bungim hevi sapos ol i lusim EU, na ol dispela i laik lusim EU i lukluk long imigresen o ol refuji i go insait long Yurop na EU i wok long kisim planti ol refuji. Na planti hevi i wok long kamap long Yurop bikos long sampela ol refuji em ol teroris i miks wantaim ol nomol pipel na go insait long ol EU na ol kantri long Wes.

UK Independence Pati (UKIP) lida Nigel Farage, i tok sapos EU i feil long kontrolim imigresen o pipel i wok long go insait na sakrifaisim sefti bilong Yurop na pipel bilong ern na larim ol rilijes ekstrimis i laik kamapim bagarap long Yurop, dispela i no gut tru.

Siameri bilong vot long lusim EU, Gisela Stuart, i tok dispela dibet long referendum em i sut long no gat kontrol long ikonomik maigresen long sampela hap bilong Yurop we Euro i wok long bagarapim ol we i wok long kamapim hevi long planti famili long Yurop.

Ol Renzi vot i bungim hevi taim 5-Star i mekim bikpela win

PRAIM Minista bilong Itali, Matteo Renzi, i kisim hatpela taim bihain long 5-Star Muvmen lain i kisim bikpela sapot na vot long Rom na Turin long las Sande we i daunim sans bilong em long win gen taim vot i kamap long mun Oktoba long dispela ya.

Risal i soim na kamapim bikpela senis long 5-Star we korapsen i wanpela bikpela eria em i lukluk long en. Na wina meri, Virginia Raggi i mekim histori taim em i kamap olsem namba wan meri meya long Rom na kantri Itali.

"Nupela taim i stat wantaim mipela," Raggi i tok. Em i winim 67 pesen vot. Em i tok pati bilong em bai wok hat long kisim bek gutpela nem bilong Itali, na tu, transperensi o mekim samting long ples klia long ol institusen long siti.

Tasol Renzi na pati bilong em, senta lef Demokretik Pati (PD) i bin mekim gut na holim pawa long Milan em fainensel kapitel bilong Itali na tu, long Bologna we ol i winim ol pati i gat nem na



Nupela meya bilong Rom i win tasol long nupela ileksen, Virginia Raggi, bilong 5-Star Movement, i tromoim han bihain long wanpela nius konprens long Rom, Itali long Jun 20, 2016.

strong long hap, ol senta rait kendidet long tupela ples ya.

Renzi i tok em bai no inap tok em i lus bikos long risal bilong vot long Sande, tasol em i tok strong long mekim ol rifom em i tok bai lukim gutpela sindaun long Itali, tasol ol i lus long Rom na Turin na dispela i soim olsem em bai kisim taim liklik, na tu, oposisen i egensim em.

Em i bin kamap praim minista long 2014 na promis olsem Itali bai lukim ol nupela senis, tasol em i

bungim hevi long mekim ikonomi bilong kantri i gro na tu, kamapim moa wok.

Lus bilong praim minista long Rom em ol i ting bai kamap bihain long pasin bilong paulim mani we i bin lukim meya bilong siti i risain, tasol lus long Turin, ples bilong mekim kar bren nem Fiat em i bikpela kirap nogut long planti lain. Na 5 Star kendidet, Chiara Appendino i bin winim nau memba, Piero Fassino husat i stap long pati long planti ya.

Ol Iraqi kem i pulap taim pipel i ronawe long pait long Falluja

PAIT namel long Stet o gavman na ol Islamik Stet (IS) militen long kisim bek Falluja i lukim bikpela mak bilong pipel i ranawe na pulapim ol kem we gavman i sanapim.

Long Falluja we i stap wanpela aua longwe long kapitel bilong Iraq em Baghdad, taim yu ran long kar, moa long 82,000 pipel i lusim siti na painim ol kem. Ol i no karim wanpela samting, ol i no gat samting tasol ol klos ol i werim taim ol i wokabaut. Ol i no gat samting na ol bai nidim oilgeta samting, UN lain long ol kem i tok.

Praim Minista bilong Iraq, Haider al-Abadi i tok gavman bai sanapim 10-pela moa kem long putim ol pipel long ol.

Ol ripot i tok wanpela kem i gat 1,800 pipel na ol i yusim wanpela toilet tasol, Nowejien Kem kaunsel i tok.

Em i tok i mobeta long gavman i go pas long dispela bikpela hevi i wok long kamap nau.

Gavman bilong Iraq i gat hevi long mani na i lukluk nau long helpim i kam long intenesenel komyuniti.

Bikpela sapot long LDP Pati bilong Praim Minista Abe

WANPELA sevei o wok painim i tok olsem Liberel Demokreti Pati (LDP) we nau Praim Minista Abe bilong Japan i memba long en, bai kisim moa sapot long dispela ya Julai 10 apa haus ileksen.

Abe i tok bai no gat seils takis o seils takis i no inap go antap inap long ya 2019. Em i tok LDP wantaim junia kolisen patna bilong em, Komeito Pati i lukluk long winim planti ol 121 sia long kisim sapot long disisenm bilong em.

Tasol Demokretik Pati i tok konstitusenel

riviu em i wanpela bikpela samting long ileksen taim Mista Abe i laik glasim US draf pasifis konstitusen.

Long sevei we Asahi Shimbun niuspepa i karimaut, 38 pesen long ol lain i stap long sevei i tok ol bai vot long LDP long ol ripresentativ vot skelim wantaim 15 pesen i go long Demokretik Pati.

Yomiuri Shimbun niuspepa i bin wokim sevei na painim olsem 35 pesen long ol lain i bin ansa long sevei i tok ol bai vot long LDP, taim 12 pesen bai vot long Demokretik Pati.

Tripela i dai na 45 kisim bagarap long leba yunien na polis

BIKPELA pait namel long tisa yunien na polis long saut Meksiko long las Sande i lukim tripela pipel i dai na 45 i kisim bagarap.

Hevi i kamap taim ol polis i laik stopim ol lain husat i memba bilong tisa yunien long blokim wanpela haiwe klostu long Nochixtlan Siti, 80 kilomita long kapitel, Oaxaca Siti.

Ol yunien memba i no amamas long polis i holim

pasim yunien lida bilong ol we ol i sutim tok long korapsen.

Ol imejensi sevis lain long Oaxaca stet i no tok wanem as tru i kirapim dispela tabel, tasol Meksiko Nesenel Sekyuriti Komisin i ripotim olsem 21 polis i bin kisim bagarap. Ol polis i bin eskotim 120 tenka trak i wok long karim kemikel pipia long Salina Cruz riifaineri em Pemex, wanpela wel

kampani we gavman i papa long en.

Ol protesta i bin haitim pes bilong ol na sut long ol polis wantaim ol ston samting.

Las wiken, ol polis i bin holim pasim Ruben Nunez, em Jenerel seketeri bilong lokal tisa yunien we ol i sutim tok long kisim mani i no kam long gutpela rot. Na ol yunien memba i egensim edukesen rifom we gavman i laik kamapim.



Ol Tisa Yunien memba long Meksiko i protes long ol strit long Meksiko Siti long egensim edukesen rifom bilong presiden.

Repsol amamas wantaim nupela ges projek



Ol konstraksen wok i kamap long Stanley ges projek long Westen Provins.

NUPELA opereta bilong Stanely Ges projek long Westen Provins i redi long kirapim namba tri ges projek bilong kantri.

Repsol i tok em i redi long kirapim dispela ges projek bihain long em i bin putim wanpela pablik notis long putim tenda long kisim ol kampani husat bai mekim fran end enjiniaring na disain (FEED).

Repsol i tok moa long 30 kampani i laik winim dispela tenda na ol i salim ol aplikesen i go.

Tasol Repsol bai kisim tupela o tripela kontrakta tasol long kirapim dispela projek, na wanpela bilong dispela kampani bai winim tenda long kirapim FEED bilong Stanley Gas Projek.

Kantri menesa bilong Repsol long Australia na PNG, Jesus Chillon, i tok dispela wok bai helpim Repsol long bihainim projek taim long statim na pinisim kontraksen bilong dispela namel sais ges projek long taim stret.

Long hariapim dispela projek, Repsol i makim Brian Harradine i kamap projek menesa bilong Stanley Ges projek.

Mista Harradine i gat ek-

spiriens long planti yia em i bin wok long oil na ges bisnis long PNG. Long Me 8 dispela yia, Repsol i kamapim bikipela wok drilling long Striklen 2 waiket eksplorasen wel long petroleum prospecting laisens (PPL) 269 long Westen Provins.

Dispela em i wanpela bikipela wok drilling Repsol i wok long mekim lng PNG taim prais bilong oil na ges i wok long pundaun long intanesenel oil na ges maket.

Long mun Me, ol bikman bilong Repsol i bin bungim Praim Minista Peter O'Neill long soim strongpela bilip na sapot ol i gat long PNG ikonomi na long kirapim dispela projek long dispela taim we oil na ges prais i wok long go daun.

Repsol i wok long toktok wantaim Ok Tedi Maining Limited (OTML) long saplaim pawa long Stanley ges long ranim maining operesen.

"Dispela bai helpim OTML i kisim gutpela na klinpela pawa saplia i kam long ges. Ok Tedi i ken kisim pawa saplai long Staley ges na larim main i operet yet sapos level bilong wara i go daun, o drai sisen i kamap," Mista Chillon i tok.

Papua LNG bai kirapim moa wokmani

PRAIM Minista Peter O'Neill i tok nupela Papua LNG Projek bai kirapim moa long 13, 000 nupela wok we ol manmeri PNG i ken mekim long sapotim famili bilong ol na kiapim ikonomi bilong kantri.

Mista O'Neill i mekim dispela toktok taim em i bin go bungim Siaman na Sif Eksekutiv Opisa (CEO) bilong Total SA, Patrick Pouyanné, long Paris, Frans long las wik.

Total SA em i wanpela bikipela oil na ges kampani husat bai kamapa operetta bilong Papua LNG Projek na kirapim dispela namba tu LNG projek long PNG.

"Ol wokman bilong Total i stap long Paris na i wok long go long Pot Mosbi, na Total SA i wok long kisim nupela ol wok manmeri long PNG long statim konstraksen wok bilong dispela bikipela LNG projek," Mista O'Neill i tok.

Mista O'Neill i tok planti ol asples manmeri bilong Galp Provins tu bai kisim nupela wok long dispela projek.

Mista O'Neill i tok tenkyu long Mista Pouyanné i bin kam raun long PNG na kisim wanpela malolo long lukluk raun long kantri.

"Mi laik tok tenkyu long Mista Pouyanné i bin kisim malolo na kam long PNG, we em i bin wanbel long lukim ol pipel na kain kain pasin tumbuna bilong PNG," Mista O'Neill i tok.

Em i askim ol arapela wok manmeri bilong Total husat bai kam long Pot Mosbi tu long lukluk raun long PNG na skelim ol kain kain kalsa na pasin tumbuna bilong PNG.

Minista bilong Petroleum na Eneji, Ben Micah na Gavana bilong Galp Provins, Havila Kavo, i bin go wantaim Praim Minista O'Neill long dispela miting.

Pastaim Gavana Kavo i bin strong tumas long gavman na Total SA i mas putim LNG plent bilong dispela projek insait long Galp Provins yet.



Praim Minista Peter O'Neill.

Total SA na Gavman i senisim plen bilong kamapim LNG plent. Tupela i laikim LNG plent i mas kamap klostu long plent bilong PNG LNG Projek.

Em bai stap long Caution Bay insait long Sentral Provins. Tasol Galp Provinsal Gavman i no bin wanbel long dispela plen bilong projek divelopa na gavman long kamapim LNG plent ausait long Galp provins.



Total SA kantri menesa na menesing dairekta, Philippe Blanchard.

Gavana Kavo i bin laikim ol i mas senisim nem 'Papua LNG Projek' i go bek gen long 'Gulf LNG Projek' bikos em i tok ges bilong dispela projek bai kam long Galp Provins.

Tasol gavman na Total SA i senisim ne i go long Papua LNG Projek na dispela nem bai kamap nem bilng dispela bikipela namba tu LNG projek bilong PNG.

Taim Mista Pouyanne i bin kam raun long PNG long dispela yia tasol, em i bin tok Papua LNG projek bai kirapim moa long 10, 000 nupela wok.

Em i bin autim toktok olsem mani mak long statim dispela projek em bai US\$ 10 bilien.

Kanntri Menesa na Menesing Dairekta bilong Total SA long PNG, Philippe Blanchard, i tok ol i wok long mekim ol wok drilling long sekim hamas ges stret i stap aninit long graun.

Taim ol i save long hamas ges i stap aninit long graun, ol i laik pinis arapela ol wok long sekim ges long olgeta ges fil we Papua LNG projek bai kisim ges.

Dispela wok bai pinis long yia 2016, Mista Blanchard i tok.



Siaman na CEO bilong Total, Patrick Pouyanné.

Em i tok long yia 2017, ol bai mipela bai i go insait long fran hao enjiniaring na disain (FEED).

Total i wok long mekim ol sosel na envairomen stadi long olgeta hap ples i stap aninit long apstrim projek eria we ol bai kisim ges long kamapim LNG.

Em i tok plen bilong Total SA em long statim LNG prodaksen long yia 2020. Long yia 2018, ol bikipela konstraksen wok bai kamap long kirapim projek.

Taim prais bilong LNG i stap gut na intanesenel maket i stap gut, Total i tingting long salim ges bilong Papua LNG long dispela taim, na em long yia 2020 na bihain taim.



**Buy Your Air Niugini Ticket
Anywhere, Anytime
Using BSP Mobile Banking.**



Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.



Air Niugini
www.airniugini.com.pg



Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicesbsp@bsp.com.pg www.bsp.com.pg

Sekyuriti kampani i gro hariap tru

SEKYURITI kampani, Black Swan International, i bin stat mekim bisnis long PNG long yia 2011.

Tasol em i gro i go bikipela na em i kamap wanpela biknem sekyuriti kampani long PNG.

Pastaim kain sekyuriti kampani olsem G4S, Kiuma Security na Guard Dog i save gat nem long sekiyuriti indastri long PNG.

Tasol nau Black Swan International kamap wanpela bikipela sekyuriti kampani na em bai kamap bikipela mo.

Brain Kelly, papa bilong kampani na Sif Eksekutiv Opisa (CEO) bilong Black Swan Internation, i tok em i gat bikipela plen long opim nupela brens na operesen bilong dispela kampani long arapela ol taun na senta long PNG.

Mista Kelly, husat i bin statim dispela kampani long yia 2011, i tok as tru bilong dispela kampani em long helpim ol bisnis haus i ran gut aninit long was bilong ol sekyuriti

man bilong Black Swan.

“Mipela i laik helpim ol bisnis manmeri na lukautim ol bisnis haus bilong ol. Black Swan i save skelim ol birua ol bisnis haus i save gat, na mipela i save was long larim bisnis bilong ol i ran gut,” Mista Kelly i tok.

Em i tok pastaim em yet i bin wok wantaim wanpela sekyuriti kampani bilong Australia ol i kolim ATMAAC International.

Mista Kelly i tok taim em i bin wok wantaim ATMAAC International, em i bin kam mekm sampela sekyuriti konsalting na risk menesmen wok long PNG long yia 2008.

“Black Swan i nau wok long gro i go bikipela na mipela i tingting long opim sampela mo nupela brens long arapela ol senta long kantri.

“Black Swan em i operet olsem PNG kampani. Mipela i operet long Pot Mosbi na Lae, tasol nau mipela i laik go aut long sampela taun na

senta we ol bisnis haus i nidim mipela long lukautim na was long ol propeti bilong ol,” Mista Kelly i tok.

Las wik Mista Kelly i bin putim wanpela toksave long niuspepa olsem dispela kampani em i no bilong Praim Minista Peter O’Neill o arapela ol man.

“Black Swan em i kampani bilong mi. Yu sekim long Invesmen Promosen Atoriti (IPA), bai yu lukim nem bilong mi tasol i stap olsem dairekta na papa bilong dispela kampani.

“Praim Minista Peter O’Neill i no gat wanpela sea-holding i stap insait long Black Swan. Ol man i wok long jeles long Black Swan i gro i go bikipela na kamap wanpela gutpela sekyuriti,” Mista Kelly i tok.

Wantok Niuspepa i bin sekim IPA rekot na dispela rekot i soim olsem Brian Kelly em yet i gat 100 pesen sea long dispela kampani, na em yet i dairekta bilong Back Swan.

Siapan kampani laik baim pis

WANPELA nupela kampani bilong Siapan i gat bikipela laik long baim ol pis bilong PNG na salim long Siapan pis maket.

Akira Kazusa, husat i bosman bilong Setouchi Holdings PNG, i kam raun long PNG las wik na em i toktok pinis wantaim wanpela bikipela kampani bilong mekim tinpis long PNG.

Mista Kazusa i toktok pinis wantaim ol opisal bilong Nesenel Piseris Atoriti (NFA) na International Food Corporation (IFC) long Lae, na em i bin bungim Ambaseda bilong PNG i go long Japan, Gabriel Dusava.

Mista Kazusa i kambek gen long PNG long toktok moa long ol invesmen we gavman bilong Siapan na PNG i bin tok long helpim manmeri bilong tupela kantri i inves na mekim bisnis.

Em i bin kam long PNG yia 2014 taim Praim Minista bilong Siapan, Shinzo Abe, i bin kam lukluk raun long kantri long strongim poroman namel long tupela kantri.

Mista Kazusa i wanbel long inves long PNG, na em i laik baim ol tuna pis long hia na salim i go long kantri bilong em yet.

Mista Dusava i apim nem bilong Setouchi Holdings na em i tok dispela kampani em i wan-pela bikipela kampani long Siapan.

“Dispela kampani em i bikipela kampani long Siapan. Ol i gat sip, ol gat bikipela siping bisnis. Ol i laik baim Tuna pis long PNG na salim i go stret long Siapan,” Mista Dusava i tok.

Em i tok ol opisal bilong dispela kampani bai go raun long Lae, Madang na Wewak long sekim ol sans bilong mekim bisnis.

Ol bai opim nupela opis long Pot Mosbi tu, Mista Dusava i tok.

Mista Kazusa i tok em i amamas long toktok wantaim ol opisal bilong NFA na IFC. Em i tok kampani bilong em i amamas long inves na mekim bisnis long hia.

“Mipela i redi long inves. Dispela invesmen bilong mipela bai helpim ol manmeri long painim wok, gavman bai kisim takis na em bai strongim poroman namel long tupela kantri bilong yumi,” em i tok.

Poroman namel long Siapan na PNG i bin kamap long yia 1975 taim PNG i kisim independens long Australia.



Setouchi Holdings i laik baim dispela kain tuna pis bilong Kadovar Ailan, Wewak LLG

Siapan i bin laik long kontrolim PNG tasol Wol Wo 2 namel long Australia na Siapan bin lukim Australia i daunim Siapan, na Australia i bin lukautim PNG.

Siapan i laik mekim bisnis long PNG, i no long piseris sekta, tasol long oil na ges, na arapela sekta tu.

Sampela bikipela oil na ges kampani bilong Siapan olsem JX Nippon, Mitsuiki OSK, Tepco, Osaka Gas Company, na Marubeni i wok long strongim invesmen long oil na ges sekta long PNG.

Hailans rijon gat bikipela sans long turisim bisnis



Kain kain bilas na kalsa bilong Hailans i ken pulim planti turis na kirapim moa turis bisnis.

HAILANS rijon i gat bikipela sans long kirapim turis bisnis bikos planti ol samting bilong kirapim turis bisnis i stap long antap.

Dispela em i toktok bilong Minista bilong Kalsa, Ats na Turisim, Tobias Kulang.

Mista Kulang i tok i gat bikipela wok i stap long mekim long kirapim turisim maket long Hailans rijon.

Em i tok taim em i kamap nupela Minista bilong Kalsa, Ats na Turisim, ol i wok long kirapim nupela sistem long kamapim ol samting long maketim turis bisnis long Hailans.

“Long dispela as tasol,

mipela bai holim wanpela bikipela bung bilong ol turis bisnis opereta, ol provinsal gavman opisal na distrik developmen atoriti long Hailans rijon.

“Dispela bung em i namba wan taim kain bung i kamap. Long dispela bung mipela bai sekim wanem kain ol samting bilong mekim turis bisnis i stap long wan wan provins bilong yumi long Hailans.

“Mipela bai bungim dispela olgeta na kirapim maket long pulim moa turis i kam insait,” Mista Kulang i tok.

Em i tok Hailans rijon i gat planti kainkain bilas

na pasin tumbuna we dispela i ken pulim planti turis i kam.

“Kalsa em i wanpela bikipela samting we mipela bai toktok long dispela bung. Kain kain kalsa bilong yumi i ken pulim moa turis i kam na kantri i ken mekim moa mani long dispela.

“Dispela em bai wanpela bikipela samting bai mipela i toktok long en.

“Tasol yumi gat arapela ol samting tu i stap. Maunten, veli na wara, kain kain ples na diwai na ol samting. Dispela olgeta i ken pulim moa turis i kam long kantri bilong yumi,” Mista Kulang i tok.

Risos sekta PR woksop skelim sosel midia

James G. Kila i raitim

SOSEL midia i gro bikipela na hariap tru long PNG na sapos nogat lo i kamap long kontrolim, em bai go het yet long givimaut kain kain giaman stori, ripot i no stret na ripot we em tambu long go aut long pablik.

Dispela em wanpela bikipela toktok i bin kamap long PNG Semba ov Mains na Petroleum Komyunikesen trening woksop i bin kamap long Jun 8 na 9 long Ela Beach Hotel long Mosbi.

Dispela trening woksop em PNG Semba ov Mains na Petroleum (PNGCMP) i redim na bringim tupela saveman bilong Australia husat i gat moa ekspirians long pablik rilesins na tu wok long maining na risos sekta, long ranim dispela trening woksop.



Woksop fesiliteta Collin Hay (sanap) na meri sindaun em, Lee Mc Clean, i harim kantri menesa bilong Total, Richard Kassman i serim stori bilong em long trening woksop long Ela Bis Hotel long Mosbi. Foto: James G. Kila

Woksop i glasim olsem planti kampani i wok long painim rot long traim menesim sosel midia long oge-naisesen bilong ol yet na kamapim midia polisi, monitarim na rot long bekim na menesim ripot i go aut.

Dispela tupela treina em Lee Mc Clean na Collin Hay wok wantaim wanpela bikipela pablik rilesins ejensi long Australia ol i kolim PPR. Dispela trening woksop long Mosbi i karamapim planti eria bilong sait long pablik rilesen na wanem rot ol i ken yusim long toktok na givim infomesen i go long ol midia ogenesen na kamapim gutpela rilesens namel long ol yet.

Ol bikipela eria insait long dispela trening woksop i bin glasim nid long redim gut pablik rilesins wok program na wanem gutpela infome-

sen long bringim aut i go long midia na tu, wanem kain rot long toktok i go kam wantaim midia. Bikipela luk-save i bin stap long sait long bekim ol kwesten ol midia lain i askim na tu wanem ol kwesten ol midia i no inap askim tumas.

Trening i bin lukluk moa long print midia na wanem ol strongpela wok bung i ken kamap namel long ol PR opisa bilong risos sekta na ol niusman meri long niuspepa.

Ol PR opisa husat i bin stap insait long trening i bin kam long Oil Search, ExxonMobil, Ok Tedi Maining, Newcrest, Morobe Maining, Ramu NiCo Menesmen (MCC), Puma Energy, Total, Hides Ges Developmen Koporesen, Barrick Niugini Limited (Porgera) na tu ol arapela sapot ogenesen insait long risos sekta long PNG.

Skul pikinini helpim ledabek trausel konsevesen

James G. Kila i raitim

OL skul sumatin bilong Dinghalic Elementeri Skul long Karkum viles, Not Kos Rot long Madang provins i amamas long putim ol tumbuna bilas wantaim purpur na soim ol yet olsem ol i luk nais na smat tru wantaim long selebretim Wol Enviromen De.

Dinghalic Elementeri Skul em i stap long Karkum viles insait long konsevesen eria bilong ledabek trausel. Dispela projek em i wanpela komyuniti bes ogenaísesen (CBO) ol i kolim Mas Kagin Tapani (Makata Inkoporeted) i kamapim wantaim helpim i kam long ovasis, long luksave long lukautim namba bilong ledabek trausel long nambis long Karkum viles na ol arapela hap insait long Sumkar distrik, Madang provins.

Ol elementeri skul sumatin i bilas, singsing, danis na wokim pilai drama wantaim ol tisa bilong ol long luksave na amamas long dispela de, Trinde Jun 7.

Ol sumatin wantaim tisa bilong ol i soim pasin bilong lukautim ol bus, wara, solwara na nambis taim ol i klinim ol nambis na bikrot we i stap klostu long nambis na tu soim ol sain ol i raitim long pepa long strongim pasin bilong lukautim enviromen.

Ol i wokabaut long nambis na klinim ol pipia bikos dispela nambis bilong ol em i ples we ledabek trausel i save go putim kiau long kamapim moa trausel bilong bihain taim.

Bod siaman bilong Dinghalic, Bob Khon wantaim deputi siaman, Willie Mayang i tokim Wantok Niuspepa olsem bikpela as tingting we ol pikinini long Dinghalic elementeri skul i laik kamapim em pasin bilong konsevesen o lukautim na banisim bus, graun, wara na solwara long ol birua.

Ol i tok, gutpela we bilong bringim aut ol gutpela tingting olsem em long lainim na yusim ol liklik pikinini bikos ol pikinini bai kamap olsem ol lida long bihain taim.

Mista Mayang i stori olsem ol pipel bilong Karkum i bin wok klostu wantaim Makata Inkoporeted long ledabek trausel konsevesen long sampela taim i pinis, aninit long wanpela agrimen ol i kolim konsevesen did. Dispela agrimen em bai go inap 5-pela yia na dispela 5-pela yia em i pinis, tasol ol komyuniti long Karkum i gat intres long kamapim bek dispela wok bilong ledabek trausel konsevesen na i laik wok gen wantaim Makata Inkoporeted long konsevesen wok long lukautim nambis bilong ol.



Dinghalic elementeri sumatin i rausim ol pipia long nambis we ledabek trausel save kam antap na putim kiau.



Ol Dinghalic sumatin putim drama long stori long pisin bilong bus.



Dinghalic skul pikinini rausim ol pipia long Madang-Bogia rot.

Wail laip konsevesen kamapim nupela rot bilong wok

Elaine Vaina - WCS PNG Midia Opisa i raitim

SOLWARA i kam antap em i mak bilong wanpela hevi bilong enviromen na em i

nidim gutpela plening, menesmen na sastenabiliti bilong ol laip na sindaun bilong ol pipel long ol kostal komyuniti.

Wail Laip Konsevesen Sosaiti Papua Niugini program i gat sans long kisim GIS opisa bilong kantri, Jacob Kimagl long go long Yunaitet Stets bilong Amerika long stap insait long namba 19 Enuel Sosaiti bilong Konsevesen Jiograpikal Infomesen Sistem (SCGIS) Konprens.

Komitmen na hatwok bilong Kimagl olsem WCS PNG GIS opisa i opim rot bilong nupela wok bilong konsevesen long PNG, bihainim wanpela awot skolasip long SCGIS.

Skolasip i gat wanpela bung edvens trening long eplikesen bilong GIS long konsevesen wantaim En-

vairomen Sistem Risets Institut (ESRI) na Juniper GIS long Blue Oak Ranch Risev long California. Em i bin go tu long 39 ESRI intenesenel Yusa Konprens long San Diego long stat bilong dispela mun.

SCGIS em i Sosaiti bilong Konsevesen bilong GIS. Ol i bin kamapim long yia 1997 olsem wanpela profesenel ogenaísesen bilong konsevesen husat i save yusim ol GIS, long ranim komyunikesen, wok bung na senisim ol data namel long ol memba. Dispela i kamapim na holim ol standet pefomens na kompitensi long konsevesen GIS wok, givim wanpela netwok bilong ol wankain lain i sekim wok bilong narapela, helpim ol pablik long lukim ol data o rekot, redim ol mit-

ing na konprens bilong ol memba, helpim ol memba long kisim ol GIS ikwipmen, sofwe na ol sevis, na helpim ol memba long stap long ol miting na ol konprens. Bikpela samting em olsem em i mekim we long ol bikpela save man bilong GIS long olgeta hap bilong wol long bung toktok na serim ol save i go i kam na helpim narapela long ol hevi na salens wantaim eksperiens bilong ol.

Enviromen Sistem Risets Institut (Esri) em i save go pas long kamapim ol GIS long wok, na em i gat luksave bilong en long wok em i save mekim long mekim GIS Saiens i go het na long givim save bilong GIS na ol tul bilong wok i go long ol lain i save wok long konsevesen.

Wok bilong Jacob Kimagl wantaim WCS PNG i bin stat long 2014 olsem wanpela sumatin. Em i stat wantaim tripela mun wok probesen long Manus Ailan bihain long em i pinis las yia bilong skul bilong em. Ol i makim em olsem GIS opisa long Epril 2014.

Kimagl i stap wok long ol fil opis bilong WCS PNG long Manus na Kavieng wantaim patna komyuniti long wokim ol mep bilong mak bilong solwara i go antap, ol klen baundri na ol arapela GIS wok.

Kimagl i gat 23 krismas tasol, nau bai em i givim wanpela pepa long wanpela kes stadi bilong solwara mak i go antap long 8-pela liklik ailan long Nu Ailan na Manus provins long konprens long USA insait long Jun 21 i go 25.



Jacob i go lukluk raun wantaim grup long Golden Geit Bris bilong - San Francisco.

Gagai i soim kalaMaroons daunim Blues gen

i kam long bek pes...



Dane Gagai scoa long Origin II.

Portugal na Austria i dro

PILAIA bilong Portugal, Cristiano Ronaldo, i bin painim hat long kisim wampela poin we referi i bin givim wampela penelti egensim ol Austria na ol i dro, 0-0, long Grup F resis long Euro Sempionsip.

Ronaldo i bin winim namba 128 kep na i brukim

rekot bilong Luis Figo, tasol em i kikim 79 minit spot kik egensim pos taim Figo i bin lukluk i stap long gren sten.

Long 85 minit, em i bin kisim bal taim ol poro pilaia i kikim bal i go pas, tasol referi i tok olsem Ronaldo i bin sanap opsait.

Austria i bin stap namba

10 long lata bilong wol, tasol Hungary i bin daunim ol, 2-0, long taim bilong opim resis.

Ol i bin rausim Portugal long namba wan raun long 2014 Wol Kap. Nau ol bai pilai egensim ol Hungary long fainel resis na Austria bai pilai egensim ol Iceland.

namba 5 taim, em i bikipela samting long mi."

"Andy i mekim gut long winiim dispela tonamen long namba 5 taim, tasol mi save olsem dispela em i no namba wan taim bilong yu long salens long resis," Raonic i tok bihain em i resis long namba wan taim long gras kot fainel.

"Dispela em i namba wan taim bilong mi long salens long gras resis long Sande na mi ting olsem mitupela bai pilai gen long ol Sande i kam. Mi gat bikipela amamas long dispela."

2013 na 2015, nau i setim bipo rekot bilong em gen wantaim ol 7-pela poro pilaia bilong em.

"Dispela tonamen i gat planti histori. Mi gat bikipela amamas long pilai long ai bilong kain man olsem John McEnroe. Sampela taim yu mas mekim sampela samting em i moa gutpela na daunim dispela kain man. Mi gat bikipela amamas long dispela," Murray i tok.

"Long win long hia long



Andy Murray i apim Queens tropi gen bihain long daunim Milos Roanic.

Pilai i kamap strong tumas na long namba 17 minit, referi i bin givim penelti egensim ol Blues tupela taim na Maroons i traime hat long bungim trai lain bilong ol Blues tasol banis bilong ol Blues i strong tumas.

Long 18 minit, referi i givim namba 3 penelti gen egensim ol Blues. Ol Maroons i kisim tupela poin we Thurston i kikim bal i go insait long golpos na skruim poin bilong ol i go antap na bungim skoa bilong ol Blues, 4-4.

Banis bilong ol Blues i strong tumas long dispela taim na long 24 minit ol Blues i strong tumas na slekim banis bilong ol Maroons tasol i no gat wampela trai i bin kamap.

Long 32 minit, winga bilong ol Maroons, Dane Gagai, i bin ran longwe na i putim namba wan trai bi-

long ol Maroons. Dispela trai bin kamap long sait lain, tasol Thurston i no bin painim hat long kisim tupela poin long dispela trai.

Ol Maroons i stap pas nau, 10-4, na ol i bin bungim pinis bilong namba wan hap bilong pilai.

Gagai i putim namba tu trai bilong ol Maroons bihain long 5-pela minit long namba tu hap bilong resis. Dispela trai tu i kamap long sait lain na i no gat wampela asua i kamap long kik bilong Thurston. Ol i bringim skoa i kam antap long 16-4.

Insait long 45 minit inap long 55 minit, banis bilong tupela tim wantaim i strong na i no gat wampela poin i kamap.

Tasol, long 56 minit, ol Blues i strong tumas na slekim banis bilong ol Maroons na putim namba wan trai bilong ol. Trai i bin

kamap namel long tupela golpos na kik bilong ol i go insait isi.

Ol Blues i bringim skoa bilong ol i kam antap long 10 tasol, Maroons i stap pas yet wantaim 16 poin.

Gagai i putim namba tri trai bilong ol Maroons long 62 minit taim Greg Inglis i kikim bal i go pas long trai lain. Tasol dispela taim, Thurston i bin painim hat long kikim bal i go insait we skoa i sanap olsem 20-10.

Ol Maroons i mekim liklik asua taim ol i bin pasim bal klostu long trai lain bilong ol Blues na pilaia bilong ol Blues, James Maloney, i stilim bal na i bin pinis lain long putim namba tu trai bilong ol Blues long 67 minit.

Tasol ol i bungim pinis taim bilong resis na Maroons i daunim ol Blues, 20-16, bihain long kik bilong ol Blues i go insait.



Cristiano Ronaldo i painim hat long kikim bal i go insait long net.

Murray win long Queens

KOSA bilong Croatia, Ante Cacic, i tok ol sapota long Euro 2016 Sempionsip em ol 'spot teroris' bihain long ol i bin tromoi lait i go antap long hap bilong sindaun long taim bilong Euro 2016 gem egensim Czech Republic.

Taim Croatia i stap pas, 2-1, referi, Mark Clattenberg, i stopim pilai bikos ol lain i stap long hap bilong ol sapota bilong Croatia na i tromoi lait i go long hap we Sain-Etienne i sindaun, bipo long ol i bungim pinis taim

bilong resis.

Taim pilai i stat, referi i bin givim wampela penelti egensim ol Croatia bikos pilaia bilong ol, Domagoj Vida, i holim bal. Tomas Necid bilong ol Czech Republic i kikim bal i go insait long 94 minit skruim poin i go antap long 2-2 dro long Grup D resis.

"Ol dispela lain em ol spot teroris, ol i no sapota, nogat," Cacic i tok.

UEFA i tok long ol bai mekim wok painimaut long

ol lain husat i bin bagarapim gem long taim bilong resis.

"Nainti-faiv pesen bilong sapota bilong yumi i bin sem long ai bilong Europe. Ol pilaia i no pilim amamas long dispela kain nogut pasin i bin kamap bihain long ol i bin pilai wampela namba wan gem," Cacic i tok.

Ol i bin rausim tupela poin bilong Croatia long kamap kwalifai na tokim ol long pilai tupela asples gem na baim 100, 000 euros fain bipo long ol i pilai wantaim ol Italy long Jun, 2015 bikos ol i bin kamapim wankain pasin



Croatia i tingim ol gol bihain long ol sapota bilong ol i bagarapim gem wantaim lait.



Ramu Projek LOA kisim indaksen trening



Treina Fred Tieng givim toktok long ol KBK LOA eksekutiv.



Grup poto bilong ol Ramu Projek LOA eksekutiv wantaim ol projek stekholda.



Mista Tangune bilong MRDC givim toktok long Fraide.



Tripela LOA siaman Peter Tai (sindaun long lephan), Toby Barre, wantaim MRDC Extenel Rilesiens menesa Imbi Tangune na nupela Kostal LOA siaman Jeffrey Kinang.

MAN o meri husat ol i makim em long lukautim na karim hevi bilong ol pipel mas save gut long mining bilong wok lida na wanem trupela mining bilong wok menesmen na wokim samt-ing stret

Dispela em sampela strongpela salens i bin kamap long las wik insait long indaksen o trening bilong ol lain lenona asosis-esin eksekutiv bilong Ramu Nikel Projek. Dispela indaksen em Mineral Risoses Atoriti i kamapim na trening em Fred Tieng bilong Komyuniti Afes na Bisnis

Menesmen konsaltensi sevises i ronim.

Dispela indaksen trening i bin kamap long las wik Trinde na pinis long Fraide long Coastwatchers Hotel long Madang.

"Lidasip em min olsem yu mas givim strongpela menesmen save na stia long pusim na givim strong long ol pipel bilong yu long wok strong long kamap long wanem mak na gol yu laikim long en," Mista Tieng i salensim ol LOA eksekutiv.

Em i tokim ol lain olsem taim ol i kisim wok insait long eksekutiv bilong LOA

ol i mas save gut olsem ol i makim ol liklik manmeri na pikinini insait long imppekt eria bilong Ramu Nikel Projek.

Mista Tieng i tokim ol LOA eksekutiv olsem mining bilong menesmen em olsem proses na sistem, na bikipela samting tru na mining bilong menesmen em long wokim samt-ing stret.

Dispela indaksen woksop em gutpela stret bikos em i givim gutpela tingting na stia long ol nupela eksekutiv bilong Ramu Projek LOA long lusave long wok bilong ol olsem lida na wanem wok

i stap long meneemen bilong LOA bilong ol.

Tripela LOA eksekutiv bilong Ramu Projek husat i stap long indaksen em ol lain long KBK LOA, Inlen Paipain na Kostal Paipain wantaim ol eksekutiv bilong ol.

Treina Mista Tieng i tok strong long indaksen olsem lidasip wok i karamapim tripela bikipela samting. Dispela em namba wan em yu lida man o meri, namba tu em ol lain husat i bihainim o stap wantaim yu na namba tri em wanem wok bai yu kamapim.


Bikipela samting we Mista Tieng i tokaut long ol LOA eksekutiv em olsem wanem asosesien ol i kamapim em fomal o lo i karamapim em na wanem bisnis em i wokim i mas go wantaim lo stret na no ken bihainim ol tingting bilong ples.

Dispela indaksen long las wik Fraide i lukim ol stekholda insait long Ramu Projek i givim ol presentesen bilong ol long wanem wok bilong ol.

Namba wan lain em divelopa yet Ramu NiCo Menesmen (MCC) we i lukim senia Komyuniti Afes

(CA) supavaisa Allan Wah-wah i givim toktok long wok bilong kampani. Bihain long em wanpela wokman bilong MRA i givim toktok long wok bilong ol na wanem seksen insait long MRA. Wanpela mains inspekta long MRA, Simon Gena tu i bin stap long stori liklik long wok inspektoret i save wokim.

Long Fraide tu i lukim Ekstenel Afes Jeneral Menesa bilong Mineral Rioses Divelopmen Koporesen (MRDC), Imbi Tangune i givim toktok long wok MRDC save wokim long givim klia tingting long ol lain LOA eksekutiv.



Olimpik De selebresen i kamap long dispela wik



Seketeri Jenerel bilong PNGOC, Auvita Rapilla, i toktok long midia. Poto: Nicky Bernard

OLIMPIK De i save kamap long Jun 23 tasol ol i bin stat selebretim long Jun 20 na bai pinis long Jun 26.

Olimpik De selebresen i save kamap long olgeta hap bilong wol, we ol skul, komyniti, spot tim, klap na ol pablik i save stap wantaim long dispela ektiviti.

Astingting bilong Olimpik De selebresen i gat tripela hap bilong winim mak em, “wokabout”, “lainim ol samting”, na “painimaut ol samting”.

Ol NOC i save go pas long spot, kalsa na edukesenel ektiviti aninit long olgeta lain, manmeri na pikinini wantaim.

Trukai Fan Ran bilong dispela yia bai kamap long dispela Sande, Jun 26 long pinisim olgeta wanpela wik program.

I gat ol planti spot ektiviti bai kamap namel long ol sumatin. Ol spot bai kamap em, etletik, ajeri, futbol (soka), basketbal, karate, hanbal, netbal na planti moa.

PNG Olimpik Komiti (PNGOC) husat i go pas long dispela program bai tilim sampela toktok long Olimpik velyu ov Rispek, Frensip na Ekselens wantaim ol narapela namba wan velyu i save promotim spot.

Ol sumatin bai i gat sans long lainim Olimpik Muvmen em i wanem, na histori bilong ol gem aninit long ol 'askim na bekim'.

Ol pablik tu bai lainim ol

dispela samting aninit long fesbuk, twita na websait bilong PNG Olimpik Komiti.

“Dispela wik i bin gat planti gutpela program wantaim planti ektiviti i bin kamap na sampela bai kamap long ol de i stap yet. Na mipela i bin lukim planti lain i bin stap wantaim na amamasim de i go na tu ol bai stap wantaim long ol de i stap yet,” Seketeri Jenerel bilong PNGOC, Auvita Rapilla, i tok.

Rapilla i tok 2016 em i yia bilong Olimpik Gems wantaim ol nupela Gem to ol i bin skruim we em bai kamap long Rio de Janeiro long Ogas, na selebresen long dispela wik tu bai mangalim moa sapot bilong etlit bilong Tim PNG husat bai go resis.

“Olimpik em i sain bilong spot long olgeta hap long wol na em i bikpela gem we olgeta etlit bai resis.

“Mipela i gat bikpela sans long makim maus bilong kantri long dispela level we sampela bikpela spot manmeri bilong mipela bai resis. Na dispela asosiesen i kamap bilong ol pipel bai luksave long ol etlit na amamas wantaim ol.

“Ol lain long Olimpik em ol wanlain bilong mipela na ol i stap wantaim long spot histori bilong mipela. Na, mipela i laik luksave long ol na tok tenkyu long ol bilong ol i sapotim spot long PNG aninit long asosiesen. Ol bai stap na kirapim tingting bilong ol jeneresen bai kamap bihain,” Rapilla i tok.

Trukai Fan Ran bai pinisim Olimpik wik



Andrew Lepani i toktok long ol ektiviti bai kamap long Olimpik wik. Poto: Nicky Bernard

TRUKAI Fan Ran bilong dispela yia bai kamap long Sande, Jun 26, long Sir John Guise Stediam bilong pinisim olgeta Olimpik ektiviti i bin kamap na dispela bai kamap long dispela wik.

Trukai Fan Ran bai stat long moning long get bilong Sir John Guise Stediam, klostu long Visoin City, na ol bai wokabout i go long Waigani opis rot. Long Waigani opis, ol bai

SP PNG Hunters i winim olgeta tripela gem i bin kamap long asples bilong ol bihain long ol i daunim ol Wynnum Manly Seagulls, 18-4, long Sande apinun long Nesenel Futbol Stediam.

Hunters i bin stap pas long namba wan hap bilong resis, 16-4.

Pilaia bilong Hunters, Blade Abavu, i bin putim namba wan trai long namba 20 minit na Noel Zeming i bin kikim bal i go insait long golpos na ol i bin stap pas, 6-0.

Bihain long namba tri minit, Zeminig i bin salim bal i go long Wartovo Puara na em i bin putim namba tu trai, tasol

Zeming i bin painim hat long putim kik i go insait.

Manly Seagulls i bin painim trai lain bilong ol Hunters bihain long sampela minit we banis bilong ol Hunters i slek liklik, na Daniel Ogden i bin putim namba wan na las trai bilong ol Manly. Kik bilong ol i no go insait na skoa i sanap olsem 10-4.

Klostu long pinis bilong namba wan hap bilong resis, Warren Glare, i skruim skoa bilong ol Hunters i go antap long 14 poin wantaim wanpela trai. Nau, kik bilong Zeming i gat moa

tanim i go olsem long baksait bilong Insevis Kolis na go olgeta long Unagi oval rot. Ol bai go bungim Friwe na i go olsem long Courts na i go olgeta long Waigani Tanol. Ol bai tanim gen long hap na bihainim waigani draiv i kam kamap long Hailanda na ol bai kam olgeta na bungim hap we ol bai stat.

Seketeri Jenerel bilong PNGOC, Auvita Rapilla, i tok olsem ol bai toksave long ol polis bilong redim sekyuriti long taim bilong wokabout.

Long dispela Olimpik wik, ol i bin go lukim pinis ol skul olsem Living Light, Lahara Birdwing, Port Moresby Grammar, na Port Moresby National High School long Mande na Tunde.

Ol etlit i bin toktok long ol spot we ol bai pilai na makim kantri long asde. Ol dispela spot em Basketbal, Ragbi 7s na Hanbal.

Tude, ol bai traim pilai olsem ol bai go resis long Olimpik Gems. Dispela pilai bai kamap long moning na apinun long Taurama Akwatik na Indo Senta we ol i bin askim ol skul long kam stap wantaim na lukim.

Ol spot bai kamap tude em Basketbal, Etletiks, Karate, Spesel Olimpiks, Kriket, Hanbal, Judo, Taekwondo, Netbal, Lig Bilong Laif na Yoga for Laif.

“Mipela bai go long Vabukori viles na ranim OVEP sesen tumora. Bihain, ol spot demonstersen bai kamap na Lig Bilong Laif ektiviti bai pinisim dispela sesen,” Andrew Lepani i tok.

Ol stekholda husat i helpim PNGOC bilong ol dispela ektiviti i kamap em Olimpik Solidarity, ExxonMobil aninit long OVEP, Coca-Cola na Paradise Foods.

Hunters i winim tripela asples resis

pawa we ol Hunters i bin stap pas wantaim 16 poin.

Banis bilong tupela tim wantaim i bin strong tumas long namba tu hap bilong resis we tupela tim wantaim i no bin painim trai lain.

Tasol, Ol Hunters i bin kisim tupela poin long 50 minit bilong resis taim we Zeming i kikim bal i go insait long golpos bihain long referi i bin givim wanpela penelti egensim ol Manly.

Awod bilong namba wan pilaia insait long dispela resis em ol i givim long huka bilon gol Hunters, Wartovo Puara Jnr.



Manmeri i bin pulap long Nesenel Futbol Stediam taim Hunters na Manly Seagulls i bin resis.

Vipers na Muruks i skelim poin

SNPS Pot Mosbi Vipers na PRK Mendi Muruks i skelim poin bilong raun namba 10 resis bihain long tupela i bin kisim wankain skoa, 10-10, long Nesenel Futbol Stediam long Sande apinun.

Muruks i bin putim tupela trai long namba wan hap bilong resis. Tupela pilaia husat i bin putim trai em Andrew Ipi na fulbek, Joe Joshua, tasol wanpela konvesen kik i no bin go insait.

John Ragi Jnr bilong ol Vipers i bin skruim skoa bilong ol i go antap long 6 poin bihain long em i bin painim trai lain bilong ol Muruks klostu long pinis bilong namba wan hap bilong resis.

Long namba tu hap bilong resis, Vipers i bin pasim olgeta rot bilong ol Muruks long painim trai lain bilong ol.

Vipers i bin strongim sait bilong ol na i bin bungim skoa bilong ol Muruks long

namba 68 minit bilong resis we Karo Kauna Jnr i bin putim trai. Kik bilong ol i no go insait na skoa i sanap olsem 10-10.

Tupela tim wantaim i bin pilai strong insait long 12 minit i stap yet long brukim banis, tasol tupela i no putim wanpela trai inap taim bilong resis i pinis.

Tupela i kisim wan wan pion long raun namba 10 resis bilong Digicel Kap.

Hunters i stap namba tri ples long leta

PNG SP Hunters i win tripela taim long asples na dispela i mekim ol long kisim namba tri ples long leta.

Ol i kisim wankain poin, 22, olsem ol Dolphins tasol, ol i stap long namba tri ples bikos ol i sot long sampela poin.

Long tripela asples gem, ol i bin daunim Manly Seagulls, 18-4, long raun 15, South Logan Magpies, 22-20, long raun 14 na Northern Pride, 22-6, long raun 13.

Kosa bilong ol Hunters, Michael Marum, i tok tim bai satp na lukluk long redi long gem bai kamap long dispela Sande long Bishop Park, Australia, egensim ol Norths Devils.

“Ol i bin mekim gut long sait bilong banis klostu long trai lain, tasol i gat planti moa wok i stap yet long mipela bai kamap orait stret,” Marum i tok.

Ol tim i stap long top 6 long leta bilong Intrus Supa Kap resis em;

- 1 Burleigh Bears wantaim 23 poin;
- 2 Redcliffe Dolphins wantaim 22 poin;
- 3 PNG Hunters wantaim 22 poin;
- 4 Townsville Blackhawks wantaim 21 poin;
- 5 Easts Tigers wantaim 19 poin na;
- 6 Sunshine Coast Falcons wantaim 17 poin.

Tkatchenko: NRL na Digicel i strongim ragbi

SPORTS Minista, Justin Tkatchenko, i tok, wok bung o patnasip namel long Nesenel Ragbi Lig (NRL) na Digicel i redim gutpela rot bilong ol yangpela long bungim driman bilong ol long pilai ol gem ol i gat laik long en.

Tkatchenko i mekim dispela toktok bihain long NRL na Digicel i tokaut long tripela yia patnasip long yusim ragbi lig long skulim na strongim ol kantri insait long Pasifik.

"Dispela patnasip em i

wanpela bikpela samting bilong ol grasrut we em i pulmapim olgeta spes i stap long redim rot bilong ol yanpela.

"Nau mipela i lukluk long planti lain Papua Niugini bai pilai ragbi na luksave long ol gem gut tru.

"Ragbi i save skulim ol pipel, givim wok long ol yangpela, mekim ol i stap helti na bungim ol pipel long ol bai amamas na stap wantaim," Tkatchenko i tok.

Minista i tok moa olsem ragbi i bin dai pinis insait long planti yia, tasol nau em i kamap laip gen bikos long lidasip na menesmen.

"Ragbi i go het long kamap orait na nau mipela bai lukluk long kamapim ol narapela gem," Minista i tok.

Em i tok tenkyu long Digicel i wok bung wantaim NRL na dispela bai lukautim ol yangpela i ken winim driman bilong ol long pilai long Kumul.

NRL na Digicel i bung long strongim Pasifik Rijon



(L-R); Mark Mom, Sif Komesel Opisa (CCO) bilong NRL, Michael Brown, Stanton Albert long Penrith Panthers, Sif Eksektiv Opisa (CEO) bilong Digicel, Maurice McCarthy, Kepten bilong Harvey Norman Jillaroos, Raun Sim, na Minista bilong Spot, Justin Tkatchenko, i sanap wantaim long taim NRL na Digicel i lonsim patnasip long Nesenel Futbol Stediam.

Wisil na Piniau bai makim PNG long Rio Olimpik

ETLETIK Papua Niugini (APNG) i tokaut long Mande olsem Toea Wisil na Theo Piniau bai makim Papua Niugini long etletik long Rio 2016 Olimpik Gems long Ogas.

Piniau i kisim dispela ples taim em i bin brukim rekot long 200 mita resis long las wik bihain long em i bin resis wantaim Mowen Boino.

Namba wan etlit long hedel resis, Boino, i winim mak insait long 51.95 seken long Sande long las resis bilong em long Florida we em i bin kisim 1034 poin long skoa bod bilong Intenesenel Asosiesen ov Etletiks Fed-eresen (IAAF).

Tasol, dispela em i no winim poin, 1072, we Piniau i setim long Jun 11.

Piniau i tok em i amamas long makim kantri bilong em

na go resis long Rio Olimpik Gems.

"Mi no gat planti toktok long mekim, tasol wanem toktok mi ken tok em, dispela em i bikpela sans bilong mi na mi lukluk long mekim fainel wok redi bipo long resis long dispela kain level bilong resis egensim ol husat bai resis wantaim mi," Piniau i tok.

"Mi tok tenkyu long Etletik PNG (APNG) long luksave na helpim mi long kamap dispela kain etlit taim mi stap long Hai Skul yet.

Mi tok tenkyu tu long PNGOC na menesmen long ol i sapotim APNG long mi ken winim dispela kain mak."

Ol i bin makim Wisil long Tim PNG bikos kwalifai taim bilong PNG Olimik Komiti (PNGOC) i pas we i no gat

narapela meri etlit i kamap klostu long kwalifai.

Wisil i kisim dispela wanpela ples long makim PNG aninit long yunivesiti rul.

Na tu, Wisil inap long ran na winim kwalifai taim, 11.32 sekens, long 100 mita resis.

Em i kamap klostu long dispela taim long Lae long Jun 11 na em bai resis egensim wanpela top rana bilong Australia, Ashley Whittaker, gen long Cairns, Australia long dispela wiken.

Em bai ran tu long Melanesien Sempionsip long Fiji long mun i kam na em i lukluk long winim mak long dispela tupela resis.

Philip Rehder bai kamap Tim Menesa bilong Etletiks long go long Rio, na Alison Fairweather bai kamap kosa.

NESENEL Ragbi Lig, NRL, na intenesenel komunikesen na entateimen kampani, Digicel, i tokaut long tripela yia patnasip namel long tupela long sapot na skulim ol ragbi lig sapota long olgeta hap long Pasifik.

Patnasip i toktok long tripela propeti:

- 1 NRL Pasifik Autris program: em i bilong skulim ol yangpela na ol meri long olgeta hap long Pasifik wantaim lukluk long bungim ol trupela sosel senis;
- 2 Sponsasip bilong Australian Paim Minista's XIII wokabaut na;
- 3 Introdaksen bilong 'Pasifik Waria' program bilong painimaut ol lain i gat gutpela kala bilong Ragbi Lig long olgeta hap bilong Pasifik.

Moa long 200, 000 sumatin na 1,000 tisa aninit long 100 skul long olgeta hap long PNG, Fiji, Samoa, na Tonga bai kisim helpim

long dispela agrimen, wantaim NRL awenes program.

Dispela program bai go het na strongim patnasip ol i bin kamapim pinis namel long Australia na PNG Gavman.

Sif Komesel Opisa (CCO) bilong NRL, Michael Brown, i tok patnasip bai strongim ragbi lig long gro bikpela long olgeta hap bilong Pasifik.

"Ragbi lig i bihainim olgeta hap bilong Pasifik na NRL i gat bikpela sans long kisim helpim long planti ol namba wan pilaia long rijon insait long planti yia," Brown i tok.

"Patnasip namel long NRL na Digicel bai strongim planti sapota long Pasifik long ol bai gat sans long stap klostu wantaim ragbi lig, na tu, em bai strongim planti skul sumatin na meri long kisim ol skul toktok na gutpela sait bilong helt."

Sif Eksektiv Opisa (CEO) bilong Digicel, Maurice McCarthy, i tok sponsasip bilong komyuniti i save i stap long bel bilong Digicel.

"Ragbi lig em i wanpela

spot we olgeta pipel bilong Pasifik i save laikim na mipela i gat bikpela amamas long wok bung wantaim NRL long strongim moa komyuniti long ol i ken i gat planti sans long developim skil bilong pilai spot. Na tu, bilong lainim ol gutpela pasin long kamap poro na wok bung wantaim," McCarthy i tok.

"Ol program bilong grasrut olsem NRL Pasifik Autris bai redim sans bilong strongim ol pikinini long winim driman na soim kala bilong ol."

Kepten bilong Harvey Norman Jillaroos, Raun Sim, i joinim Stanton Albert long Penrith Panthers long Nesenel Futbol Stediam, Pot Mosboi, long taim NRL na Digicel i lonsim patnasip.

Agrimen sain bilong Digicel bai stap antap long yunifom bilong Australian Paim Minista's XIII tim taim ol bai pilai egensim ol PNG Paim Minista's XIII tim long Nesenel Futbol Stediam long Septemba.

LinkPNG

Call now for great value one way fares

Call toll free on 180 5465 visit www.airniugini.com.pg or email sales.linkpng@airniugini.com.pg for further information.



LinkPNG

A Subsidiary of Air Niugini





MI KIK: Namba seven bilong Mendi Muruks i mekim liklik kik long pilai bilong taim namba 7 bilong Pot Mosbi Vipers i ran i kam long takolim em long Digicel Kap resis pilai bilong long Mosbi. Tupela tim i dro 10-10.



BAGARAP LIKLIK: Ase Boas i kisim bagarap na kam aut long pilai graun, wantaim helpim bilong Dokta Sam.



MIPELA YA: Ol summating bilong St Johns Praimeri skul i sanap wantaim Stanton Albert long NFS.



ISI YA: Kepten bilong Vipers Samuel Koim i kisim bikpela takol long ol Muruks long wiken pilai bilong ol.



KIK NA RAN: Hunters hap bek Watson Boas i mekim liklik kik bilong em i go long lain bilong ol Wynnum Manly Seagulls long Sande pilai bilong ol long NFS long Mosbi.



BRUKIM BANIS: Warren Glare bilong SP Hunters i bringim banis bilong Seagulls long pilai bilong ol long wiken. Hunters i win 18-4.



MIPELA TU GAT NAMBA: Ol sumatin meri bilong St Johns Praimeri i sanap wantaim Ragbi sta meri bilong Australia, Ruan Sims long NFS.



DIANA Tuna

*Niupela Swit Teist
Nau Igat Moa Oil!*



PNG's ORIGINAL TUNA

PNG MADE  Manufactured by:
RD TUNA CANNERS LTD.

Gagai i soim kala

...Maroons daunim Blues gen

NOT Kwinslan Maroons i dainim ol Blues, 26-16, long gem namba II bilong Stet ov Orijin resis i kamap long asples bilong ol Maroons long Suncorp Stadium, Brisbane.

Winga bilong ol Maroons, Dane Gagai, i bin soim stail na kala bilong em we em i bin putim namba wan inap namba tri trai bilong ol Maroons.

Namba 4 trai bilong ol Maroons i bin kamap long 72 minit we Darius Boyd i putim.

Lek bilong Johnathan Thurston i no painim hat long putim olgeta kik i go insait, tasol kik bilong em long namba tri trai bilong Gagai i no bin go insait.

Long namba tu minit, Thurston i bin kik na traim long putim wanpela trai tasol, Blues i isi tasol kisim bal na ol Maroons i bin takolim ol blues long trai lain bilong ol.

Long namba 5 minit, Thurston i bin pasim bal long wanpela poro pilaia bilong em na em i no bin kisim bal yet na wanpela Blues pilaia i bin takolim em. Referi i bin givim penelti egensim ol Blues na Thurston i bin kisim tupela poin long penelti kik.

Ol Maroons i stap pas wantaim 2 poin long namba 5 minit, tasol long namba 9 minit, referi i bin givim wanpela penelti egensim ol Maroons na ol Blues i bin kisim 2 points aninit long penelti kik. Skoa i sanap olsem, 2-2.

Long namba 13 minit, Greg Inglis wantaim poro pilaia bilong em i bin apim kepten bilong ol Blues, Paul Galen, na referi i bin givim penelti egensim ol Maroons. Ol i bin sanap longwe na kikim dispela penelti kik i go insait na Blues i stap pas gen, 4-2.

ridim moa long pes 23...



Paul Gallen
i takolim
Josh McGuire.



Strongpela Marasin Bilong Kus Gutpela Prais

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.
 Tel +675 325 3185 Fax +675 325 0190 Email sales@johnstons.com.pg